



Relasaun entre povu
no estadu liu husi
auditoria sosiál

MATADALAN KONA-BA
AUDITORIA SOSIÁL
BA TIMOR-LESTE



The Asia Foundation



MATADALAN KONA-BA **AUDITORIA SOSIÁL** BA TIMOR-LESTE

AGRADESMENTU

Matadalan ida ne'e produs husi Dr. Keren Winterford no Caitlin Leahy husi Institute for Sustainable Futures iha University of Technology, Sydney (ISF: UTS). Dezenvolvimentu matadalan ne'e no workshop Formasaun ba Formador sira hala'o iha Dili iha fulan-Marsu 2017, realiza ho finansiamentu husi Uniaun Europea, liuhosi The Asia Foundation no FONGTIL.

Peskizadór sira hakarak agradese ekipa The Asia Foundation bagia no konsultasaun suporta, halo esbosu no treinamentu matadalan ida ne'e. Peskizadór sira mós apresia komentáriu ne'ebé valór boot tebetebes no suporta husi FONGTIL - ReNAS no Unidade Auditoria Sosiál Gabinete Primeiru Ministru. Importante liu hotu, ba organizasaun sosiedade sivil sira no pontu fokál sira tanba laran di'ak ona hodi fó sira nia tempu, kuñesimentu no partisipasaun ativu iha faze peskiza no mós workshop Formasaun ba Formador sira atu bele asegura katak rekursu ida ne'e útil no relevante hodi bele suporta prática auditoria sosiál iha Timor-Leste. Obrigadu ba reprezentante Asosiasaun Chega! Ba Ita (AcBIT), Alola Foundation, Sentru Estudus ba Dame no Dezenvolvimentu / Centre of Studies for Peace and Development (CEPAD), Hametin Agrikultura Sustentavel Timor Lorosa'e (HASATIL), Hametin Demokrasia Igualdade (HDI), Ita Ba Paz, Knua Haberan Comunidade (KHC), Luta ba Futuru, Luta Hamutuk, Mata Dalan Institute (MDI), Ministério da Agricultura e Pescas, Ministério da Educação, Ministério de Saúde, Ministério Infra-estructura, Provedór ba Direitus Umanus no Justisa (PDHJ), Plataforma Nasional ba Agúa e Saneamento (PN BESI TL), Rede Feto, Sustainable Development Goals Working Group of the Government of Timor-Leste, Timor-Leste Coalition for Education (TLCE), no WaterAid Timor-Leste.

Ilustrasaun sira halo husi Julie Smith (pdconsulting@optusnet.com.au). Suporta tradusaun fornese husi Michael Andersen no Francez Suni. Dezeňu final no layout halo husi Nuno Ferreira e Costa.

ÍNDISE

Prefásiu.....	6
1. Introdusaun.....	8
Objetivu husi Matadalan ne'e.....	8
Matadalan ne'e prepara ona ba sé-sé de'it?.....	8
Maneira ne'ebé uza hodi dezenvolve matadalan ne'e.....	8
Revizaun ba Matadalan.....	9
2. Saida mak Auditoria Sosiál?.....	10
Definisaun ba Auditoria Sosiál.....	10
Benefísiu sira husi Auditoria Sosiál.....	11
Ba sidadaun sira.....	11
Ba Governu.....	11
Glosáriu Termu sira.....	12
Kompara auditoria sosiál ho asaun sira seluk husi sidadaun sira no aprosimasaun sira ba Governu nia akontabilidade.....	14
Parte interesada sira iha auditoria sosiál.....	15
3. Auditoria Sosiál iha Timor-Leste.....	16
Esperiénsia ho Auditoria Sosiál sira iha Timor-Leste.....	16
Polítika no lei sira ne'ebé apoia Auditoria Sosiál sira.....	17
Memorando de Entendimento (MdE) entre GPM no FONGTIL - ReNAS.....	17
Mekanizmu Institusionál.....	20
Prosesu nacionál sira seluk ne'ebé importante.....	23
Desentralizasaun.....	23
Objetivu Dezenvolvimentu Sustentavel (ODS sira/ SDGs).....	24
Zona Especiais de Economia Social de Mercado de Timor-Leste (ZEESM).....	24

4. Hala'o Auditoria Sosiál.....	25
Faze 1 - Prepara no Halo Planu.....	26
1.1 Determina setór ka programa ka projeto ne'ebé sei foka ba iha auditoria sosiál ne'e.....	26
1.2 Identifika Governu nia promesa no indikadór sira ba auditoria sosiál..	27
1.3 Halo análise ba kontestu no parte interesada sira.....	28
1.4 Hametin komunidade nia envolvimentu.....	29
1.5 Hetan envolvimentu husi autoridade no fornesedór servisu sira.....	32
Faze 2 - Implementa auditoria sosiál.....	34
2.1 Hili instrumentu sira hodi hala'o auditoria sosiál.....	34
2.2 Organiza no fó treinamentu ba ekipa auditoria sosiál no Pontu Fokál sira.....	35
2.3 Uza instrumentu sira hodi halibur dadus.....	38
2.4 Sorumutu Interfase no planeia asaun.....	39
Faze 3 - Halo promosaun ba reforma sira.....	42
3.1 Komunika rezultadu (findings) sira.....	42
3.2 Halo advokasia ba reforma sira.....	43
3.3 Planeia siklu tuir mai.....	46
5. Prosesu no Instrumentu.....	47
6. Referénsia Útil.....	80

PREFÁSIU

Timor-Leste Restaura independénsia besik dékada rua ona, hahú ho tranzisaun ONU iha prosesu konstrusaun Estadu no ba Dezenvolvimentu Nasional ne'ebé presiza iha envolvimentu husi entidade Timor-oan hotu atu asegura governasaun diak no governasaun moos.

Parseria sosiedade sivil ho governu importante tebes iha país murak ida ne'e, tanba bele fó kontribuisaun ba dezenvolvimentu iha setór oi-oin, nune'e mós ita hotu hatene katak ba dezenvolvimentu NASAUN ida tenke iha kontribuisaun ema hotu-hotu nian, mezmu knar no responsabilidade la hanesan, maibé ho variadade knar sira ne'e mak bele fó kontribuisaun hodi atinje mehi estadu no povu nian ba moris di'ak.

Ami rekoñese katak ema hotu preokupa, tantu Governu, sosiedade sivil no setór privadu bainhira mosu iniciativa Auditoria Sosiál, maibé iniciativa Auditoria sosiál ho intensaun di'ak ba povu nia moris no ajuda hadiak prestasaun serbisu governu nian, ne'e duni iniciativa auditoria sosiál ne'e atu enkoraja liu tan partisipasaun ema hotu nian iha konstrusaun Estadu no ba dezenvolvimentu nasional. Ikus mai iniciativa Auditoria sosiál ne'e, iha data 25 de Maiu 2015 konkriticiza liu husi asina memorandum de intendimentu ida entre Governu Timor-Leste, ne'ebé reprezenta husi Primeiru Ministro VI Governu Konstitusional, Dr. Rui Maria de Araujo, no Sosiedade Sivil reprezenta husi Diretor Ezekutivu Forum ONG Timor-Leste (FONGTIL), Sr. Arsenio Pereira da Silva.

Kontinuasaun husi asinatura memorandum de intendimentu fó biban ba parte rua atu hala'o ida-idak nia kna'ar tuir mandatu servisu, parte governu hamosu Unidade Auditoria Sosiál iha Gabinete Primeiru Ministro (UAS-GPM) no husi parte sosiedade sivil hamosu Rede Nasional Auditoria Sosiál (ReNAS) iha FONGTIL nia estrutura, ho funsaun halo koordenaun mutua entre ReNAS-FONGTIL ho UAS-GPM iha implemtasaun programa auditoria sosiál.

Atu implementa auditoria sosiál iha Timor- Leste, sosiedade sivil hamosu livru matadalau ida ne'e hodi già ema hotu (sosiedade sivil no komunidade beneficiariu) ne'ebé sei implementa servisu auditoria sosiál ba kualkér projetu ne'ebé implementa. Nune'e ita hotu hein katak sei iha kooperasaun mutua entre implementador projetu, beneficiariu no ekipa auditoria sosiál ne'ebé bele rezulta impaktu sosiál pozitivu iha implementasaun projetu.

Ami fiar katak livru matadalau auditoria sosiál ida ne'e seidauk perfeitu, maibé appropriadu atu uza ba implementasaun auditoria sosiál tanba livru matadalau ida ne'e dezenvolve tuir kondisaun no situaun iha Timor-Leste ne'ebé simplesmente bele evolui nafatin iha tempu sira tuir mai.

Hau nia agradese ua'in ba Sua Excelénsia Primeiru Ministro RDTL, Uniaun Europeia, Fundasaun Azia, ekipa sosiedade sivil auditoria sosiál, Ekipa hakerek livru matadalau auditoria sosiál, no ema hotu ne'ebé interesse ba auditoria sosiál, tanba ita hotu nia kontribuisaun mak Timor-Leste bele iha livru matadalau auditoria sosiál.

Antes taka, hau hato'o hau nia lian motivasaun katak: "**“Mezmu ema ida-idak ho nia kna'ar ketak-ketak maibé ho ita hotu nia kontribuisaun no servisu hamutuk, ita sei presta servisu di'ak liu no ita hotu nia solimutu mak sai forsa ida, hodi muda ita povu Maubere ba moris di'ak.”**

Obrigado barak,
Arsenio Pereira da Silva
Diretor Ezekutivu FONGTIL

Prefásiu

Wainhira Governu Konstitusionál da-VI simu pose iha loron 16 fulan Fevereiru tinan 2015, lori Governu tomak nia naran, Xefe Governu konvida organizasaun sosiedade sivil sira atu halo parseria ho governu hodi bele tau matan ba lala'ok servisu publiku nian sira ne'ebé governu presta ba povu Timor-Leste.


Diskusaun sira ne'ebé mak hala'o entre Gabinete Primeiru Ministru ho Organizasaun Sosiedade Sivil kona-ba auditoria sosial deskobre katak iha nesesidade atu sosializa konseitu parseria ida ne'e no oinsá mak bele liga auditoria sosial ho servisu Estadu nian hirak seluk ne'ebé mak eziste ona, tuir Lei.

Livrete ida ne'e hanesan parte ida husi prosesu atu introdúz kona-ba: saida mak auditoria social; se mak hala'o auditoria sosial no oinsá maka komunidade sira bele partisipa iha auditoria sosial. Livrete ida ne'e mos fo informasaun balu kona-ba mandatu no knar Instituisaun Estadu sira nian hanesan: Inspesaun Jeral Estadu (IJE), Provedoria Direitus U manus no Justisa (PDHJ) no Komisaun Anti Korupsaun (CAC). Informasaun hirak ne'e importante atu foti ba ás natureza komplementariedade auditoria sosial nian ne'ebé la'os atu halo fali servisu Entidades hirak ne'e nian.

Ha'u hein katak livrete ida ne'e sei ba to'o organizasaun sosiedade sivil sira no komunidade Timor-Leste sira hotu atu bele habelar liu tan informasaun kona-ba auditoria sosial.

Ho koñesimentu ne'ebé maka di'ak, ita hein katak komunidade sira sei partisipa ativa liu tan iha implementasaun auditoria sosial, nune'e sei kontribui di'ak liu ba hamosu efisiénsia no efikásia iha prestasaun servisu no política pública sira.

Ha'u hakarak atu livrete ida ne'e util ba ema hotu-hotu ne'ebé hakarak atu hatene kona-ba auditoria sosial no enkoraja ema hotu atu hola parte iha implementasaun auditoria sosial iha Timor-Leste.



Dr. Rui Maria de Araújo
Primeiru Ministru
Repúblika Demokrátika Timor-Leste

1. INTRODUSAUN

OBJETIVU HUSI MATADALAN NE’E

Matadalan ne’e iha objetivu hodi fó orientasaun ba Organizasaun Sosiedade Sivil (OSS) sira no membru komunidade kona-ba oinsá halo auditoria sosiál iha Timor-Leste.

Matadalan ne’e fahe ba seksaun prinsipál sira hanesan tuir mai:

- Seksaun 1: Introdusaun ba Matadalan
- Seksaun 2: Introdusaun ba auditoria sosiál no konseitu prinsipál sira
- Seksaun 3: Kontestu kona-ba auditoria sosiál iha Timor-Leste
- Seksaun 4: Implementasaun ba auditoria sosiál
- Seksaun 5: Instrumentu sira ba auditoria sosiál

MATADALAN NE’E PREPARA ONA BA SÉ-SÉ DE’IT?

Matadalan ne’e prepara ona ba OSS sira hodi permite sira forma no apoia membru komunidade iha prosesu auditoria sosiál.

Matadalan ne’e fó orientasaun jerál kona-ba oinsá halo auditoria sosiál ne’ebé bele uza iha kualkér setór, programa ka projetu iha Timor-Leste.

Iha espetativa katak OSS sira no komunidade sei adapta informasaun husi Matadalan ne’e hodi garante fleksibilidade no prática única entre OSS sira, komunidade sira no setór oioin.

Iha espetativa katak orientasaun ne’ebé fó ona iha Matadalan ne’e sei informa abordajen ida ba auditoria sosiál iha Timor-Leste ne’ebé konsistente ho kualidade aas.

MANEIRA NE’EBÉ UZA HODI DEZENVOLVE MATADALAN NE’E

Matadalan ne’e dezenvolve durante Janeiru – Marsu 2017. Hakerek-na’in sira halo tur etapa sira tuir mai hodi prepara Matadalan ne’e:

- Revee dokumentasaun ne’ebé relevante ba auditoria sosiál iha Timor-Leste. Inklui dokumentu Governu iha nível nasional no relatório no apresentasaun sira kona-ba prática OSS to’o agora
- Entrevista ho OSS sira no reprezentante sira husi Governu ne’ebé envolvidu iha auditoria sosiál (Janeiru 2017)
- Revee manuál sira ne’ebé eziste ona kona-ba auditoria sosiál no manuál relevante sira seluk ne’ebé uza iha Timor-Leste

- Revee literatura relevante iha nível internasional kona-ba auditoria sosiál
- *Apresentasaun, resposta no comentáriu iha workshop Formasaun ba Formador ida nia laran ho parte interesadu importante sira governu no sosiedade civil iha Dili (1 - 2 Marsu 2017), ne'ebé informa prosesu atu revee no finaliza Matadalan ne'e.*

REVIZAUN BA MATADALAN

Matadalan ne'e tenke sai dokumentu moris ida (kontemporariu) no ita bele aumenta ka troka bazeia ba práтика ne'ebé kontinua no saida mak OSS sira no komunidade aprende ona husi auditoria sosiál.

FONGTIL - ReNAS mak nain ba Matadalan ne'e hodi OSS iha Timor-Leste sira-nia naran, no hein katak FONGTIL - ReNAS sei halo análise no revizaun ba Matadalan ne'e depoizde uza tinan rua ona. Importante atu atualiza Matadalan ne'e ho rekoñese kontestu ne'ebé muda beibeik iha Timor-Leste.

2. SAIDA MAK AUDITORIA SOSIÁL?

DEFINISAUN BA AUDITORIA SOSIÁL

Auditoria sosiál nu'udar prosesu ida ne'ebé apoia sidadaun sira hodi monitoriza Governu nia servisu hodi garante katak dezenvolvimentu nasional fó benefisiu ba ema hotu-hotu.

Auditoria sosiál bele foka ba servisu regulár ka programa ka projetu ida. Auditoria sosiál ida bele ezamina aspetu sira husi servisu, programa ka projetu ne'e, inklui asesu ba informasaun; envolvimentu públiku iha planeamentu; implementasaun reál ne'ebé kompara ho padraun servisu; jestaun finanseira no rezultadu sira ba membru komunidade.

Auditoria sosiál inklui prosesu diálogu iha ne'ebé parte interesada sira husi komunidade, setór privadu, sosiedade sivil no governu fahe sira-nia opiniaun kona-ba Governu nia prestasaun servisu, projeto ka programa no sira servisu hamutuk hodi identifika asaun sira ne'ebé nesesáriu atu hadi'ak.



Imajen 1: Diálogu

Auditoria sosiál bele fó fatin ka espasu ba komunidade hodi partisipa ho ativu no fó komentáriu kona-ba Governu nia prestasaun servisu ba públiku hodi determina karik servisu sira fornese duni benefisiu pozitivu ba ema hotu. Governu iha obrigasaun hodi responde ba komentáriu husi komunidade. Problema balu bele responde liuhosi asaun ka solusaun imidiata iha nível komunidade; problema balu dala ruma presiza tempu naruk liu hodi hetan resposta, ka dala ruma presiza mudansa política durante tempu naruk no asaun husi governu nasional.

BENEFÍSIU SIRA HUSI AUDITORIA SOSIÁL

Ba sidadaun sira

Hakbi'it: Auditoria sosiál bele hakbi'it komunidade liuhosi sira-nia partisipasaun iha planeamentu no implementasaun ba Governu nia servisu, programa ka projetu sira.

Inkluzauun: Auditoria sosiál promove partisipasaun liuliu ba ema vulneravel ka grupu ne'ebé la iha kbi'it hanesan feto, foin-sa'e, no ema ho defisiénsi.

Responsabilidade: Auditoria sosiál bele tulun komunidade sira atu hola responsabilidade hodi jere servisu, programa ka projetu ida, inklui ba kontinuasaun ka manutensaun tempu naruk iha ne'ebé servisu ka projetu ida jere husi grupu bazeia ba komunidade ida.



Imajen 2: Sidadaun ne'ebé ativu
(vota, partisipa iha sorumtu komunidade, fó rezultadu ba autoridade sira)

Ba Governu

Garante dezenvolvimentu nasional fó benefísiu ba ema hotu-hotu: Auditoria sosiál bele ajuda Governu sira hodi verifika katak fundu público sei utiliza didi'ak no katak dezenvolvimentu nasional sei ajuda ema hotu-hotu hetan moris ne'ebé di'ak. Prosesu ne'e bele promove transparénsia, akontabilidade no implementasaun servisu, programa no projetu sira ne'ebé efikás ho kualidade di'ak.

Sustentabilidade: Auditoria sosiál bele suporta sustentabilidade servisu, programa no projetu sira ho maneira promove propriedade konjunta (sentimentu sai nain) husi komunidade, governu no setór privadu.

Influénsia ba política: Konkluzaun sira husi auditoria sosiál bele informa no hadi'ak Governu nia política, planeamentu no orsamentu sira.

Envolvimentu no diálogu ne'ebé konstrutivu: Prosesu no saida mak aprende ona husi auditoria sosiál bele tulun parte interesadu sira iha nível lokál (komunidade no fornesedór servisu sira) atu comprende malu di'ak liu tan, liuliu iha nível komunitáriu. Auditoria sosiál bele kria oportunidade ba assaun konjunta hodi hadi'ak implementasaun no rezultadu sira husi Governu nia servisu, programa no projetu sira.

GLOSÁRIU TERMU SIRA

Akontabilidade: Sira ne'ebé iha podér ofisiál tenke responsabiliza, ka foti responsabilidade, ba sira-nia asaun. Iha aspetu rua husi akontabilidade; responsabilidade no ezekusaun.

Responsabilidade: Governu, ninia ajénsia, kontraktór, no ofisiál públiku tenke fornese informasaun kona-ba sira-nia desizaun no asaun, no fó justifikasaun ba públiku no ba instituisaun sira ne'ebé tau matan programa sira Governu nian (n.e. Parlamentu Nasional, Komisaun Anti Korupsaun, Tribunál).

Ezekusaun: Públiku ka instituisaun sira ne'ebé tau matan programa sira Governu nian bele fó kastigu ka solusaun ida ba Governu, nia ajénsia no funcionáriu públiku sira bainhira sira halo buat ida ne'ebé sala. Instituisaun sira ne'ebé fiskaliza programa sira Governu nian bele iha obrigasaun ba responsabilidade no ezekusaun.

Advokasia: Apoiu públiku ka rekomendasau ba kauza ka política ida. Advokasia foka hodi muda política, sistema, prática no atitude sira. Iha objetivo hodi influensia desizaun sira iha sistema no instituisaun político, ekonómiku no sosiál.

Sidadania: Deskreve relasaun entre indivíduu sira (sidadaun) no sira-nia Governu (Estadu). Sidadania refere ba indivíduu sira-nia direitu hodi partisipa no mós sira-nia responsabilidade hodi foti asaun.

Diálogo: Ko'alia no rona iha sorumetu ho grupu, hodi hetan komprensaun konjunta, hadi'a no hametin relasaun no estabelese parseria ho kolaborasaun no asaun konjunta. Bele uza nahe biti hodi halo ida-ne'e.

Hakbi'it: Deskreve indivíduu sira-nia kapasidade hodi hili entre opsaun sira no iha influénsia ho maneira signifikativa ba kestaun sira ne'ebé afeta sira-nia moris.

Governasaun di'ak: Governasaun di'ak refere ba oinsá membru husi Governu iha nível oioin uza podér ho efikás, onestidade, imparsiál, transparente no ho akontabilidade.

Auditoria sosiál: Dalan ida hodi apoia sidadaun sira-nia partisipasaun iha prosesu monitorizasaun ba Governu nia servisu, programa ka projetu sira.

Transparénsia: Informasaun ho asesu di'ak, disponivel no klaru kona-ba Governu nia servisu, projeto no programa sira, inklui padraun ka marku-referénsia ba servisu, planu, desizaun, política no lei sira.

Administraun pública: Parte sira husi Governu (departamentu no funzionáriu público) ne'ebé implementa política husi Governu inklui estabelese orsamentu no planu sira, no mós fiskaliza oinsá uza fundu público.



Imajen 3: Transparénsia

Kompara auditoria sosiál ho asaun sira seluk husi sidadaun sira no aprosimasaun sira ba Governu nia akontabilidade

Auditoria sosiál ne'e la'os auditoria financeiru!

Auditoria financeiru ne'e halo husi péritu tékniku independente sira, atu fornese avaliaasaun financeiru detalladu ida ba relatório financeiru no prosesu halo relatório governu ka negósiu nian.

Auditoria sosiál ne'e halo husi komunidade sira atu avalia dezempeñu no impaktu husi servisu, programa ka projetu ruma governu nian. Ida ne'e inklui hárree ba informasaun orsamentu maibe la foka ba avaliaasaun financeiru detalladu. Auditoria ezamina dezempeñu ka rezultadu husi servisu/programa/projeto ne'ebé bazeia ba opiniaun husi sira (membru komunidade) ne'ebé esperiênsia servisu, programa ka projeto ne'e.

Auditoria sosiál diferente husi dalan sira seluk hodi hametin Governu nia akontabilidade inklui:

- Sidadaun sira hili reprezentante sira liuhosi eleisaun sira
- Governu no administrasaun pública iha fiskalizasaun no kontrolu internu

Auditoria sosiál signifika katak sidadaun ordináriu sira halo papél direta hodi superviziona ajénsia Governu sira-nia dezempeñu.

PARTE INTERESADA SIRA IHA AUDITORIA SOSIÁL

Parte interesada sira iha auditoria sosiál iha Timor-Leste mak:

SÉ	PAPÉL
<i>Membru komunidade:</i>	Partisipa no lidera prosesu hodi avalia Governu nia servisu; fó opiniaun kona-ba servisu públiku sira; fó sujetaun hodi hadi'ak
<i>Lider komunidade:</i>	Partisipa iha prosesu auditoria sosiál, maibé mós bele sai lider iha prosesu auditoria sosiál iha nível lokál no bele akompaña asaun sira ne'ebé propoin ona
<i>Fornesedór servisu:</i>	Funzionáriu públiku mak ema sira ne'ebé servisu ba governu ne'ebé simu pagamentu atu presta ka jere servisu, programa ka projetu sira iha komunidade, inklui mestre/a sira iha eskola públiku sira no ofisiál saúde iha postu saúde sira.
<i>Governu lokál (Munisípiu):</i>	Kontraktór privadu sira mak kompaña privadu sira no organizasaun naun-governamentál sira ne'ebé karik mós simu kontratu atu fornese servisu, programa ka projetu ruma.
<i>Governu nasional - Ministériu sira ne'ebé relevante / Unidade Auditoria Sosiál iha Gabinete Primeriu Ministru (UAS-GPM):</i>	Fornesedór servisu partisipa iha prosesu verifika governu ninia servisu; fó opiniaun kona-ba servisu públiku sira; fó sujetaun ba melloramentu; bele foti asaun atu rezolve problema sira iha nível lokál bainhira posivel.
<i>Forum ONG Timor-Leste (FONGTIL) - ReNAS:</i>	Bele partisipa iha prosesu auditoria sosiál, sai lider xave iha prosesu auditoria sosiál iha Nivel Munisípiu, no akompaña asaun sira ne'ebé propoin ona
<i>Organizasaun Sosiedade Sivíl (OSS sira):</i>	Fó asesu ba informasaun ofisiál, sai parte importante hodi apoia auditoria sosiál no akompaña asaun sira ne'ebé propoin ona
	Fó apoiu tékniku no koordenasaun ba OSS sira ne'ebé halo auditoria sosiál no atu liga setór OSS ho governu
	Servisu ho komunidade sira, OSS sira seluk no, Governu hodi halo auditoria sosiál no kontinua hodi promove mudansa ne'ebé bazeia ba rezultadu

3. AUDITORIA SOSIÁL IHA TIMOR-LESTE

ESPERIÉNSIA HO AUDITORIA SOSIÁL SIRA IHA TIMOR-LESTE

Organizasaun Sosiedade Sivil (OSS sira) iha Timor-Leste halo auditoria sosiál ka prosesu sira ne'ebé atu hanesan dezde Timor-Leste hetan Independénsia iha 2002. Iha práтика di'ak barabarak ne'ebé bele utiliza hodi garante susesu ba iniciativa auditoria sosiál ne'ebé hamosu foin daudaun ne'e husi Primeiru Ministro Dr. Rui Maria de Araujo, nu'udar xefe Governu Konstitusionál Da-6 iha Timor-Leste.

Kompromisu husi Primeiru Ministro Sua Exelénsia Dr Rui Maria de Araújo, iha momentu nia hola pose iha loron 16 Fevereiro 2015, loke espasu ida ba auditoria sosiál iha Governu laran liuhosi Unidade Auditoria Sosiál. Ida-ne'e fó oportunidade foun hodi hametin relasaun entre Estadu no sidadaun sira iha Timor-Leste. Primeiru Ministro hatete iha nia diskursu katak; "Governu hakarak estabelese parseria hodi hametin partisipasaun ativa ema nian liuhosi Auditoria Sosiál, indikadór husi asaun Governu nian sei hetan avaliasaun ne'ebé ho akontabilidade aas, nune'e mak liuhosi servisu hamutuk, ita iha kbiit atu halo fornesimentu servisu ba povu di'ak liu."

Iha lei, política, organizasaun no instituisaun balu ne'ebé importante iha Timor-Leste ne'ebé apoia no promove práтика auditoria sosiál no seksaun ne'e temi idaidak. Ema barak iha Governu no sosiedade sivil halo kompromisu hodi servisu hamutuk atu bele garante katak sidadaun sira iha lian no sai ativu iha prosesu dezenvolvimentu nasional.

Figura 1 apresenta deskrisaun jerál kona-ba parte interesada sira ne'ebé importante iha auditoria sosiál no relasaun entre sira.




Figura 1: Parte interesada no relasaun sira ne'ebé importante iha auditoria sosiál iha Timor-Leste

POLÍTIKA NO LEI SIRA NE'EBÉ APOIA AUDITORIA SOSIÁL SIRA

Tuir mai mak lista lei no política importante ne'ebé apoia práтика auditoria sosiál iha Timor-Leste.

Konstituisaun RDTL

Konstituisaun Repúblika Demokrátika Timor-Leste fó direitu no responsabilidade sira ne'e sai fundamentu ba auditoria sosiál.

Sidadaun sira-nia direitu no responsabilidade sira ne'ebé importante inklui:

- Sidadaun hotu-hotu iha direitu ba liberdade ba espresaun no direitu atu informa no hetan informasaun ho izensaun (Artigu 40.1).
- Sidadaun hotu-hotu iha direitu atu apresenta petisaun, keixa no reklamasaun ba órgaun soberanu ka autoridade naran ida atu defende nia direitu ka interesse jerál (Artigu 48).
- Sistema demokrátiku nia kondisaun no meiu importante ida maka mane ho feto sira-nia partisipasaun direta no ativa iha vida política (Artigu 63.1).

Estadu nia responsabilidade importante sira inklui:

- Estadu nia lejizlasaun no desizaun (nasionál no lokál) tenke publiqua iha jornál ofisiál, no lejizlasaun ka desizaun laiha efikásia jurídika kuandu la publiqua (Artigu 73.1)
- Governu tenke elabora nia programa, inklui objetivu no tarefa sira ne'ebé atu hala'o, medida sira ne'ebé atu hola no orientasaun política prinsipál sira ne'ebé atu tuir no tenke entrega buat hirak ne'e ba Parlamentu iha Iorom 30 dezde Governu hahú nia funsaun (Artigu 108.1 no 108.2)
- Tribunál Superiór Administrativu, Fiskál no ba Kontas iha kompeténsia hodi halo fiskalizasaun ba despeza pública nia legalidade no halo julgamentu ba Estadu nia konta (Artigu 129.3).
- Administrasaun Pública sei organiza hodi evita burokratizasaun, hakbesik servisu ba populasaun sira no tenke tane aas interesse pública (Artigu 137.1 no 137.2).
- Governu mak elabora no Parlamentu Nasionál mak aprova Estadu nia Orsamento Jerál. Tenke fó informasaun klaru kona-ba reseita no despeza, no informasaun ne'e labele sekretu (Artigu 145.1 no 145.2).

Memorando de Entendimento (MdE) entre GPM no FONGTIL - ReNAS

Iha Maiu 2015, *Memorando de Entendimento* (MdE) ida asina ona entre Governu Repúblika Demokrátika Timor-Leste no Forum ONG Timor-Leste (FONGTIL) - ReNAS kona-ba auditoria sosiál.

Akordu ida-ne'e entre Governu no sosiedade sivil hametin direitu no responsabilidade sira ne'ebé hatuur ona iha Konstituisaun RDTL, no detalla enkuadramentu ida ba kooperasaun kona-ba auditoria sosiál. Tuir akordu ne'e, Governu no FONGTIL konkorda atu sai parseiru hodi halo programa auditoria sosiál iha Timor-Leste.

MdE fó definisaun kona-ba auditoria sosiál hanesan tuir mai:

1. Atividade ida hodi garante katak sidadaun sira bele iha asesu adekuadu no informasaun korreta iha tempu adekuadu. Informasaun ne'e bele ajuda sidadaun sira hodi avalia funzionáriu públiku no Governu nia dezempeñu hodi hatene karik sira transparente, efikás no envolve públiku. Sidadaun sira bele halo avaliasaun ba servisu sira, akontabilidade sosiál no responsabilidade ambientál.
2. Bele tulun funzionáriu públiku sira hodi hadi'ak sira-nia servisu no hadi'ak kualidade husi servisu públiku.
3. Organizaun sosiedade sivil bele halo auditoria sosiál ho objetivu atu tulun Governu no nia benefisiáriu sira (povu).
4. Laiha objetivu atu tau sala ba funzionáriu públiku. Iha objetivu atu avalia dezempeñu husi organizaun sira hodi hatene karik sira realiza objetivu sosiál, ambientál no komunitáriu. Hodi hatene karik organizaun sira kumpre valór no objetivu sira ne'ebé sira kompromete atu tane aas.

Auditoria sosiál iha Timor-Leste

“Auditoria sosiál nu’udar meiu hodi garante katak sidadaun sira bele hetan informasaun ne'ebé suficiente, loloos no iha tempu adekuadu, kona-ba práтика sira ne'ebé relasiona ho transparénsia, efisiénsia, efikásia, no partisipasaun públika, nu’udar meiu ba públiku hodi avalia prestasaun servisu, akontabilidade sosiál, no responsabilidade ambientál husi funzionáriu públiku ka Governu ba sidadaun sira” (MdE kona-ba auditoria sosiál 2015).

MdE ne'e mós esplika prinsípiu xave husi auditoria sosiál iha Timor-Leste:

- a) Perspetiva múltipla/Lian oioin**, inklui opiniaun husi parseiru hotu-hotu ne'ebé envolvidu ka hetan impaktu husi programa ne'ebé implementa daudaun;
- b) Kompletu**, relata faktu hotu-hotu kona-ba organizaun ida ka Governu nia dezempeñu;
- c) Partisipativu**, enkoraja parseiru sira-nia partisipasaun hodi fahe no subliña sira-nia valór sira;
- d) Multidiresionál**, parseiru sira hato'o sira-nia sujestau ka komentáriu oioin kona-ba aspetu oioin;
- e) Regulár**, halo auditoria sosiál ho regulár hodi kria kultura organizasional (kostume) no kobre atividade oioin;

- f) Komparativu**, kompara dezempeňu ho indikadór esternu sira no kompara dezempeňu ne'e ho papél sira seluk ne'ebé atu hanesan no prosesu halo relatóriu.
- g) Verifikasioun**, inklui revizaun no avaliaoun ba rezultadu sira husi auditoria sosiál;
- h) La konfidensiál/Nakloke**, rezultadu husi auditoria tenke nakloke ba públiku no relata ba komunidade exetu informasaun ne'e kona-ba seguransa nasionál no defeza;
- i) Bazeia ba evidénsia**, tenke uza métodu peskiza ne'ebé rigorozu hodi halibur dadus ho nune'e rezultadu sira iha kualidade di'ak no konfiavel.

Dekretu-Lei Nú. 32/2008 iha Iorón 27 Agostu kona-ba Prosedimentu Administrativu

Dekretu-lei ida-ne'e hatete katak prosedimentu administrativu (dokumentu sira) ne'e gratuitu, exetu norma legál espesífika determina pagamentu taxa ka despeza ba Administrasaun. Karik ema/organizasaun ne'ebé husu dokumentu ne'e bele komprova katak nia laiha kapasidade ekonómika hodi selu taxa ne'e, sira la presiza selu taxa ne'e (Artigu 8).

Dekretu-lei ida-ne'e mós hatete katak indivíduu iha asesu ba tribunál sira bainhira presiza rezolve litíju kona-ba aktu husi Administrasaun bainhira iha violasaun ba sira-nia direitu ka interesse ne'ebé lei fó protesaun ba (Artigu 9).

Ema indivíduu mós iha direitu atu simu informasaun husi Administrasaun bainhira sira husu kona-ba progresu ba prosedimentu iha ne'ebé sira iha interesse diretu, no mós iha direitu atu hetan informasaun kona-ba desizaun definitiva ba sira. Informasaun ne'ebé fó ba sira tenke inklui fatin ne'ebé prosedimentu ne'e hala'o daudau, aktu no investigasaun ne'ebé halo tiha ona, problema sira ne'ebé hetan atensaun no desizaun ne'ebé foti ona, no mós elementu sira seluk ne'ebé sira husu (Artigu 20).

La presiza fó informasaun ne'ebé klasifikadu ka sekretu; karik bele kompromete objetivu husi prosedimentu ka ema seluk nia direitu fundamental (Artigu 20).

Tenke fó informasaun iha lorón servisu 10 nia laran. Karik Administrasaun lakohi fó informasaun, tenke fó justifikasioun forte ne'ebé eskrita (Artigu 20).

Dekretu-Lei 43/2016 - Regra sira ne'ebé relasiona ho Asesu ba Dokumentu Ofisiál

Dekretu-lei ida-ne'e esplika etapa sira ne'ebé tenke foti hodi husu dokumentu ofisiál (Artigu 10). Etapa hirak-ne'e hanesan tuir mai:

Etapa 1: Ema ka organizasaun sira tenke haruka pedidu eskritu ba membru Governu ka dirijente aas liu husi instituisaun relevante.

Etapa 2: Pedidu eskritu ne'e tenke inklui:

- Identifikasioun ba dokumentu (husu dokumentu ida ne'ebé?). Autoridade sira tenke fó apoiu hodi esplika identifikasioun ne'ebé di'ak liu no korreta.
- Forma no tipu dokumentu
- Naran, enderesu, kontaktu no asinatura husi ema ne'ebé husu asesu

Etapa 3: Kualkér autorizasaun ne'ebé tenke aneksa ba pedidu ne'e.

Iha loron servisu 10 nia laran, membru Governu ne'ebé kompetente (ka delegadu) tenke responde ba pedidu ne'e. Bele fó resposta ida hodi rejeita pedidu; sira bele husu rekerente hodi hadi'ak pedidu; fó-sai sertidaun, dokumentu, ka konvite ba enkontru ka rejeita asesu ba dokumentu ho razaun sira (Artigu 11).

Esbosu Dekretu Lei kona-ba Auditoria Sosiál

Objetivu prinsipál husi inisiativa auditoria sosiál mak atu kontribui ba kualidade melloradu servisu públiku sira no ba efetividade política públiku sira, liuhosi adaptasaun ba kontestu sosiál, ekonómiku, polítiku, ambientál no kulturál.

Daudaun ne'e Unidade Auditoria Sosiál iha Gabinete Primeiru Ministro (UAS - GPM) prepara ona esbosu dekretu-lei ida atu regula no institusionaliza atividade auditoria sosiál sira. Esbosu lei ne'e konsulta hela parte relevante sira hanesan ReNAS no OSS sira atu hetan komentáriu molok esbosu ne'e defini no hetan páreser husi Primeiru Ministro.

Esbosu dekretu-lei ida ne'e estabelese norma no prinsípiu aplikavel sira ba prosesu auditoria sosiál, no mós defini modelu kolaborasaun besik ida entre Estadu no komunidade atu hala'o auditoria sosiál. Nesesiadade atu regula asuntu ida ne'e mosu husi vizaun Governu nian katak auditoria sosiál ne'e instrumentu ida atu hametin política sira, no Governu ninia objetivu atu sistematiza no konsolida prinsípiu no regra sira ne'e aplicavel ba ida ne'e, no atu klarifikasi ba termu sa'ida mak Estadu presiza partisipa iha prosesu ida ne'e.

MEKANIZMU INSTITUSIONÁL

Tuir mai mak lista instituisaun no organizasaun importante ne'ebé apoia práтика auditoria sosiál iha Timor-Leste. Sira halo papél formál tuir *Memorando de Entendimento* 2015 ne'ebé asina entre Governu Repúblika Demokrática Timor-Leste no FONGTIL - ReNAS kona-ba auditoria sosiál, ka sira sai nu'udar instituisaun importante ne'ebé eziste no iha mandatu legál no/ka konstitusionál relasiona ho akontabilidade governu.

Instituisaun hirak ne'ebé mensiona iha kraik karik bele uza no foti asaun tuir rezultadu auditoria sosiál sira, ka suporta auditoria sosiál sira ho informasaun ka perisia.

Rede Nasionál kona-ba Auditoria Sosiál (FONGTIL - ReNAS)

ReNAS harii iha 25 Maiu 2015 no sai parte husi FONGTIL (Forum ONG Timor-Leste) no nia membru sira mai husi membru FONGTIL ne'ebé envolvidu iha auditoria sosiál. ReNAS iha Konsellu Diretivu. FONGTIL lokaliza iha Kaikoli, Dili no iha pontu fokál sira iha kada Munisípiu. Informasaun kontaktu mak email: forumngo.tis@gmail.com, telefone 3321005, 7422821 ka 7236782 no website: <https://fongtil.org/>

FONGTIL-ReNAS nia responsabilidade sira ne'ebé hakerek iha MdE inklui:

- Buka fundu hodi fahe ba OSS sira hodi hala'o atividade auditoria sosiál.
- Forma no apoia OSS no komunidade sira iha nível munisípiu, postu administrativu no suku hodi garante katak iha monitorizasaun ativa ho kualidade di'ak ba Governu nia programa dezenvolvimentu sira.

- Sai pontu fokál hodi komunika atividade auditoria sosiál nian ba Governu. Sei komunika entre sosiedade sivil no Governu.
- ReNAS sei iha Konsellu Diretiva ne'ebé kompostu husi peritu sira ne'ebé sei avalia prosesu auditoria sosiál tomak, sei fó sujestaun kona-ba metodolojia no sei sai mentór durante implementasaun auditoria sosiál. Memburu sira sei verifika mós relatório auditoria sosiál molok haruka ba Governu.
- Sei relata rezultadu sira husi auditoria sosiál ne'ebé halo tuir protokolu komunikasaun no diseminasaun ne'ebé sei asina entre ReNAS no Governu ne'ebé reprezenta husi Gabinete Primeiru Ministru (dezenvolve daudaun).

Responsabilidade no oportunidade ba FONGTIL - ReNAS atu suporta auditoria sosiál ne'ebé mensiona durante workshop Formasaun ba Formador sira iha fulan Marsu 2017 inklui:

- Atu tulun OSS sira no koordena ho UAS ba asesu ba dokumentu governu sira. Ne'e karik bele inklui koordena OSS sira ne'ebé servisu iha setór ne'ebé hanesan no fahe informasaun ne'ebé halibur tiha ona.
- Atu konfirma ho governu indikadór (promesa) sira husi governu relasiona ho setór / programa espesífiku sira.
- Atu koordena ho OSS sira ne'ebé servisu iha setór idaidak atu fahe kuñesimentu kona-ba prosesu sira iha governu (n.e. atu comprende birokrasia).
- Atu liga OSS sira ba Unidade Auditoria Sosiál iha Gabinete Primeiru Ministru.
- Atu akompaña ho parte relevante sira husi governu kona-ba problema sira ne'ebé boot liu ne'ebé identifika durante auditoria sosiál ne'ebé karik presiza tempu naruk atu responde.

Unidade Auditoria Sosiál iha Gabinete Primeiru Ministru (UAS-GPM)

UAS-GPM harii bazeia ba Diploma Ministeriál iha 2015. Informasaun kontaktu mak: Palácio do Governo, Edifício nº10 Avenida Marginal, Dili, Timor-Leste. Número Telefone: 3331230

Unidade Auditoria Sosiál iha Gabinete Primeiru Ministru iha responsabilidade sira hanesan tuir mai:

- Hodi apoia atividade auditoria sosiál ho política loloos.
- Tulun OSS sira hetan asesu ba informasaun husi governu ne'ebé sira presiza hodi halo auditoria sosiál se informasaun ne'e la sensivel ka konfidensiál. Informasaun ne'e inklui: política sira no lejizlasaun; dokumentu projeto; entrevista sira; planu estratéjiku no planu asaun anuál, no seluseluk.
- Fó apoiu tékniku ba atividade auditoria sosiál ho másimu posivel.
- Fó finansimentu, karik disponivel, hodi implementa atividade kapasitasaun hodi apoia auditoria sosiál, maibé la fó finansimentu ba atividade auditoria sosiál.
- Atu verifika kazu sira ne'ebé hatama husi auditoria sosiál.
- Servisu ho Governu hodi garante aseitasaun ba rezultadu no rekomentasaun sira husi auditoria sosiál no tenke inklui iha planu no política dezenvolvimentu no akompaña Governu nia planu orsamentu anuál.

Pontu Fokál Auditoria Sosiál sira iha Ministériu sira nia laran

Pontu Fokál Auditoria Sosiál sira nomeia tiha ona ba liña minsitériu 13. Pontu Fokál hirak ne'e tau iha fatin atu servisu ho prosesu monitorizasaun no avaliaasaun internu iha sira nia Ministériu no atu liga ba UAS-GPM. Pontu Fokál sira tau tiha ona ba: Ministério do Estado Coordenadór Agricultura e Economia/Ministério da Agricultura e Pescas; Ministério das Obras Públicas, Transporte e Telecomunicação; Ministério de Comércio, Indústria e Ambiente; Ministério da Saúde, Ministério do Interior; Secretário do Estado Juventude e Desporto; Secretário do Estado Apoio Parlamentar; Ministério dos Negócios Estrangeiros e Cooperação; Secretário do Estado Empoderamento Mulher; no Ministério da Educação.

Auditoria Sosiál bele komplementa prosesu regulár internál Ministériu ba monitorizasaun no halo revizaun liuhosi aumenta povu ninia lian no fornese perspetiva adisionál no informasaun kona-ba prestasaun servisu, programa ka projetu ida.

Komisaun Anti-Korrupsaun (KAK)

KAK harii iha 2009 (Lei 8/2009) no iha papel hodi prevene no combate korrupsaun. KAK enkoraja sidadaun ka organizasaun hotu hodi relata korrupsaun ba KAK liuhosi telefone ka mensajen telemóvel (7326597; 7326599; 7991568), diretamente (ko'alia ho pesoál KAK), ho surat eskritu (haruka ba Edifíciu KAK) ka liuhosi email (cacinfodiak@gmail.com).

Haree <http://cac.tl/report-corruption-2/how-to-report>

Provedór ba Direitus Umanus no Justisa (PDHJ)

PDHJ harii ona iha 2004, no iha responsabilidade hodi simu no investiga keixa sira husi público hasoru poder público kona-ba violasaun alegadu husi governasaun dí'ak no direitu umanu. PDHJ tenke refere keixa sira ba KAK ka Procuradoria-Jerál karik iha possibilidade katak crime akontese ona. Karik sidadaun sira hakarak hato'o keixa kona-ba administrasaun pública, sira bele prienze formuláriu eletróniku (<http://pdhj.tl/contact>), telefone ba Edifíciu Dili liuhosi 3331184, vizita eskritóriu Dili iha Estrada Kaikoli, Dili, ka vizita edifíciu regional haat iha Baukau, Maliana, Oekusi ka Same. Sidadaun sira bele hakerek keixa ka tau keixa iha Kaixa Kesa nian ne'ebé tau iha edifíciu Administrasaun Munisípiu iha Timor-Leste nia Munisípiu 13. PDHJ iha mandatu atu halo mediasaun ba keixa sira se parte envolvidu sira aseita. PDHJ mos envolve iha monitorizasaun direitu umanu no governasaun dí'ak ne'ebé luan liután (láho keixa espesífiku ruma).

Tribunál Superiór Administrativu, Fiskál no ba Kontas (TSAFK)

TSAFK harii iha 2012, maibé funsiona nu'udar Kámara Auditoria iha Tribunál Rekursu nia laran hodi "halo fiskalizasaun ba despeza pública nia legalidade no halo auditoria ba Estadu nia konta". Kontratu ho valór \$500.000 ba leten tenke hetan pré-autorizasaun husi Kámara Auditoria. Tribunál bele analiza kazu jestaun la loos ba fundu público.

Inspetór-Jerál Estadu (IJE)

IJE harii iha 2009 hodi servisu hamutuk Governu no garante katak administrasaun pública funsiona ho didi'ak, transparénsia no responsabilidade. IJE iha papél rua:

- 1) Kontrola no superviziona atividade administrasaun pública liuhosi vizita monitorizadaun hodi garante katak Estadu nia osan sei gasta ho loloos.
- 2) Fó apoiu tékniku ba Governu hodi halo jestau no supervizaun.

Parlamentu Nasional (PN)

Parlamentu Nasional iha papél hodi tau matan no iha responsabilidade hodi aprova no superviziona lei sira ne'ebé relasiona ho kestaun interna no internasional. Parlamentu Nasional iha membru na'in-65. PN mós iha komisaun permanente 7 hodi fó konsellu no halo rekomendasau kona-ba tópiku oioin. Nu'udar exemplu, Komisaun A haree ba Asuntu Konstitusionál, Justisa, Administrasaun Pública, Podér Lokál no Anti-Korrupsaun.

Orsamentu Jerál Estadu

Importante katak rezultadu sira husi auditoria sosiál bele influensia prosesu Orsamentu Jerál Estadu. Komisaun Revizaun Orsamentál prepara Orsamentu Jerál Estadu tinan-tinan no tuir mai haruka ba Konsellu Ministru hodi haree. Orsamentu tenke entrega ba Parlamentu Nasional molok 15 Outubru. Ida-ne'e signifika katak rezultadu sira husi auditoria sosiál tenke entrega ba Ministériu sira to'o Abril tanba iha momentu ne'e Ministériu sira prepara sira-nia orsamentu hodi entrega ba Komisaun Revizaun Orsamentál.

Orsamentu Jerál Estadu tenke nakloke ba público. Governu tenke entrega relatório sira kona-ba oinsá sei gasta orsamentu durante fulan 3, 6 no 9 ba Parlamentu Nasional no *Câmara de Contas do Tribunal Superior Administrativo, Fiscal e de Contas* (TSAFK) no mós relatório final ba tinan ida-ne'e.

PROSESU NASIONÁL SIRA SELUK NE'EBÉ IMPORTANTE

Iha prosesu nasional sira seluk ne'ebé importante ne'ebé bele relasiona ho auditoria sosiál.

Desentralizasaun

Durante Konferénsia Nasional kona-ba Auditoria Sosiál ne'ebé hala'o iha 19 Outubru 2016, Primeiru Ministru hatete katak V Governu Konstitusionál harii daudaun sistema governu lokál liuhosi desentralizasaun no hahú iha 2017 kada Munisípiu sei iha orsamentu rasik. Desentralizasaun iha faze tolu (pré-deskonsentrasaun, deskonsentrasaun no desentralizasaun).

Responsabilidade hodi implementa servisu komesa entrega ona ba Munisípiu sira, no kompeténsia balu entrega ona. Governu centrál bele delega responsabilidade sira iha área saúde, edukasaun, agrikultura no infraestrutura bázika. Ida ne'e signifika katak governu Munisipál sira hola responsabilidade ba prestasaun servisu no ezekusaun orsamentu. Maske nune'e poder atu halo desizaun, alokasaun orsamentu no halo política nafatin iha Governu Sentrál. Atividade auditoria sosiál iha futuru bele relasiona ho Governu Munisipál sira-nia papél no responsabilidade sira.

Objetivu Dezenvolvimentu Sustentavel (ODS sira/ SDGs)

Iha Setembru 2015, governu sira iha maioria NASAUN iha mundu tomak konkorda hodi realiza objetivu 17 ba dezenvolvimentu sustentavel molok 2030. Iha Setembru 2015 Konsellu Ministru aprova rezolusaun ida hodi rekoñese importânsia husi Ajenda 2030 no ODS sira, no hatete katak iha kompromisu haka'as an hodi realiza objetivu sira no estabelese Grupu Servisu ODS, ne'ebé lidera husi Gabinete Primeiru Ministru.


Grupu Servisu ODS agora daudaun liga objetivu sira ho RDTL nia Planu Estratéjiku ba Dezenvolvimentu 2011-2030. Grupu Servisu ODS rekomenda ba Governu hodi foka uluk liu ba objetivu partikulár, mak objetivu 2 [nutrisaun no seguransa ai-han], 4 [edukasaun] no 9 [komponente infraestrutura]. Iha potensiál ba resultadu sira husi auditoria sosiál hodi apoia monitorizasaun relasiona ho objetivu hirak-ne'e. Relasiona ho ida ne'e, resultadu sira husi auditoria sosiál bele mós tulun monitoriza governu halo tuir (*kumpri*) lei direitu umanu internasional.

Zona Especiais de Economia Social de Mercado de Timor-Leste (ZEESTM)

Zona espesiál ekonomia sosiál merkadu ne'ebé aplika ba enklave Oecusse-Ambeno no Illa Atauro iha jurisdisaun ketak ida husi parte Timor-Leste sira seluk. Ida ne'e signifika katak auditoria sosiál ne'ebé akontese iha fatin hirak ne'e presiza atu konsidera lei, politika no prosedimentu administrativa espesífiku sira ne'ebé aplikavel ba area ZEESTM, alende buat hirak ne'ebé aplikavel ba NASAUN tomak. OSS sira ne'ebé halo auditoria sosiál iha ZEESTM sei presiza servisu ho sekretariadu rejonál sira husi Autoridade Rejonál Rejiaun Administrativa Espesiál.

4. HALA’O AUDITORIA SOSIÁL

Bazeia ba esperiénsia práтика kona-ba auditoria sosiál iha Timor-Leste no práтика di’ak iha nível internasional, iha matadalan ne’e auditoria sosiál defini nu’udar siklu ida ne’ebé hala’o iha faze 3. Iha kada faze iha etapa no instrumentu balu atu uza, ne’ebé estruturizadu iha tabela tuir mai no mós iha diagrama siklu auditoria sosiál iha kraik ne’e.



Tempu ba auditoria sosiál iha kalendáriu nia laran:

- Bainhira mak atu hala'o auditoria sosiál ne'e depende ba programa, projeto ka servisu ne'ebé ita atu halo auditoria ba. Nu'udar exemplu, ba projeto konstrusaun ida, ita presiza hein to'o bainhira projeto ne'e kompleta ona molok komunidade bele monitoriza no verifika katak promesa sira husi konstrusaun ne'e halo tuir duni no avalia rezultadu sira ba komunidade. Ba servisu ida ne'ebé regular ka lao ba beibeik, hanesan servisu saúde no edukasaun, ita bele halo ita nia auditoria sosiál kada tinan ka kada fulan ne'en nu'udar parte husi revizaun regulár no siklu planeamento.
- Rezultadu husi auditoria sosiál bele kontribui ba planeamento governu no prosesu orsamentasaun. Keta haluha katak Ministériu sira sei prepara sira nia planu ba Orsamentu Jerál Estadu iha fulan Abril.
- Ita sei presiza atu buka hatene prosesu planeamento internu husi Ministériu ne'ebé sei involve iha ita nia auditoria sosiál atu hatene oinsa atu submete ita nia rezultadu sira ho di'ak liu tuir dalan ida ne'ebé bele influensia prosesu halo desizaun governu nian.

FAZE 1 - PREPARA NO HALO PLANU

1.1 Determina setór ka programa ka projeto ne'ebé sei foka ba iha auditoria sosiál ne'e

Tanbasá ida-ne'e importante?

Bainhira Ita determina foku ba auditoria sosiál ne'e sei ajuda Ita hatene Governu nia promesa sira no bele hala'o siklu auditoria sosiál hodi verifika karik planu ne'e implementa ka lae.

Garante katak foku ba auditoria sosiál tenke espesíku tebes tuir possibilidade. Nu'udar exemplu - Postu Saúde ho tipu ida de'it - la'ós servisu saúde tomak; programa ida, n.e. programa merenda eskolár; ka konstrusaun estrada espesíku ruma. Identifika foku jeográfiku, n.e. suku ka munisípiu.

Saida mak Ita presiza atu halo?

Determina foku ba auditoria sosiál nu'udar etapa primeiru iha prosesu. Ita presiza konsulta ho parte interesada lokál sira hodi defini foku husi ita nia auditoria sosiál atu garante katak auditoria ne'e komunidade sira ne'ebé mak sai benefisiáriu husi projeto, programa ka servisu ruma sira nia interesse duni.

Bele foka ba servisu regulár husi Governu (edukasaun ka saúde); programa Governu (programa Fini ba Moris) ka projeto ho prazu espesíku (konstrusaun estrada ka monta servisu eletrisidade).

Programa, projeto no servisu sira ne'ebé sai foku ba auditoria sosiál bele implementa husi funzionáriu públiku ka kontrata ba kompaña privada ka ONG.

Bainhira mak Ita tenke halo ida-ne'e?

Ida-ne'e etapa primeiru iha siklu auditoria sosiál!

Durasaun: Ida ne'e presiza tempu la to'o semana 1. Se Ita hili foku bazeia ba konsultasaun ho komunidade, karik ne'e presiza tempu naruk liu.

Sei hamosu rezultadu saida de'it?

Depois Ita completa etapa ne'e, Ita sei iha foku klaru ba Ita nia auditoria sosiál.

1.2 Identifika Governu nia promesa no indikadór sira ba auditoria sosiál

Tanbasá ida-ne'e importante?

Objetivu husi auditoria sosiál mak atu monitoriza no avalia Governu nia servisu. Hodi halo nune'e, tenke identifika saida mak Governu promete atu fo'o, no tuir mai sukat progresu no impaktu bazeia ba promesa ne'e. Asesu ba informasaun nu'udar parte importante tebes husi etapa ida ne'e atu hatene governu nia promesa sira.

Saida mak Ita presiza atu halo?

Ita tenke identifika no hetan dokumentu oioin husi Governu ne'ebé relevante ba servisu, programa ka projetu ne'ebé Ita identifika ona nu'udar foku ba auditoria sosiál. Ita tenke reeve dokumentu hirak-ne'e hodi identifika saida mak Governu promete atu fo'o no indikadór saida de'it mak eziste ona hodi hatene karik Governu realiza ka lae saida mak promete tiha ona.

PROSESU 1: Oinsá bele hetan asesu ba governu nia dokumentu sira

Bainhira Ita tenke halo ida-ne'e?

Ita tenke reeve Governu nia dokumentu sira iha faze inisiál husi siklu auditoria sosiál tanba sei ajuda Ita atu halo planu ba faze sira seluk husi Ita nia auditoria sosiál.

Durasaun: Etapa ida ne'e karik han tempu semana 1 - 4. Prepara-an ba tanba karik ida ne'e han tempu naruk liu tanba difikuldade atu bele hetan dokumentu, ho nune'e Ita tenke iha pasiensia no konsistensia (*persistente*). Bainhira bele estabelese ona promesa sira, dokumentu hirak ne'e sei bele disponivel no bele asesa ho fasil ba siklu tuir mai.

Sei hamosu rezultadu saida de'it?

Hafoin completa etapa ida-ne'e, tenke iha komprensaun kle'an kona-ba servisu, programa ka projetu ne'ebé Ita avalia daudaun liuhosi Ita nia auditoria sosiál. Ita tenke iha komprensaun klaru kona-ba saida mak Governu promete tiha ona no indikadór sira ne'ebé nesesáriu hodi dezenvolve Ita nia instrumentu auditoria sosiál. Ita sei hatene lakuna sira ne'ebé eziste iha informasaun, ne'ebé Ita bele taka liuhosi sorumutu no diskusaun ho parte interesada sira iha etapa tuir mai.



SUJESTAUN - Dala ruma araska atu hetan informasaun husi Governu. Tenke persistente hodi hetan informasaun ne'e! Servisu ho parte interesada oioin hodi hetan tulun. Servisu ho funzionáriu pùbliku sira ne'ebé bele ajuda Ita hetan asesu ba informasaun; servisu ho organizasaun OSS sira seluk; buka apoiu husi ReNAS no UAS. Instituisaun sira hanesan KAK no PDHJ karik bele mós ajuda ita atu asesu informasaun hirak ne'e.

Karik laiha indikadór ne'ebé aseita ona hodi monitoriza governu nia promesa sira , Ita bele servisu ho funzionáriu pùbliku lokál hodi aseita indikadór sira ne'ebé bele uza ba auditoria sosiál.

Nota katak promesa governu sira ba prestasaun servisu dala barak atualiza tiha ona – asegura katak Ita uza promesa sira ne'ebé ikus liu ba kada siklu foun husi Ita nia auditoria sosiál.

Kontinua halo promosaun ba informasaun transparente husi Governu ne'ebé inklui deklaraun klaru kona-ba governu nia promesa hodi fornese servisu, programa ka projetu sira ho asesu ba ema hotu-hotu.

1.3 Halo análise ba kontestu no parte interesada sira

Tanbasá ida-ne'e importante?

Hodi hala'o prosesu auditoria sosiál ho susesu tenke envolve grupu parte interesada hotu-hotu ne'ebé nesesáriu. Etapa ida-ne'e ajuda Ita identifika parte interesada, sira-nia papél espesífiku no pozisaun no oinsá grupu oioin relevante ho Ita nia prosesu auditoria sosiál.

Análise ba kontestu no parte interesada sira mak importante tanba razaun oioin:

- Hodí hatene parte interesada oioin/diferente no garante katak *sei fahe hanoin hotu-hotu ne'ebé diferente ne'e* iha siklu auditoria sosiál
- Hodí hatene sé mak iha *podér* no *kontrolu* hodi foti desizaun no garante katak sira partisipa iha etapa no iha motivasaun hodi responde ba rekomendasau sira no foti asaun
- Hodí hatene sé mak iha *influénsia* ba ema sira ne'ebé hola *desizaun* no bele servisu ho Ita hodi hetan mudansa
- Hodí hatene parte interesada oioin ne'ebé servisu iha setór ne'e, hodi harii koligasaun ho sira. Ida-ne'e sei ajuda Ita fahe konkluzaun no rekomendasau sira ho ema seluk ne'ebé bele mós foti asaun hodi hetan mudansa. *Hatene no servisu ho parte interesada sira seluk bele ajuda nu'udar parte husi esforsu advokasia durante tempu naruk.*

Saida mak Ita presiza atu halo?

Ita tenke identifika parte interesada oioin ne'ebé bele envolvidu iha auditoria sosiál. Tuir mai Ita tenke analiza sira-nia knar no konsidera asaun hotu-hotu ne'ebé Ita bele foti hodi servisu ho sira.

PROSESU 2: halo mapeamentu ba parte interesada sira & analiza podér

Bainhira Ita tenke halo mapeamentu ba parte interesada sira?

- Iha faze inisiál husi prosesu auditoria sosiál: atu ajuda identifika sé mak tenke envolve iha prosesu auditoria sosiál no dokumentu saida de'it mak presiza hetan.
- Depois reevee tiha dokumentu sira: hodi haree karik atór sira seluk importante
- Durante sorumutu dahuluk ho komunidade: garante katak atór lokál hotu-hotu identifika tiha ona no tuir mai konvida sira hodi partisipa iha auditoria sosiál
- Depois Ita identifika problema no rekomendasaun sira: ajuda Ita define Ita nia asaun advokasia.

Durasaun: Etapa ida ne'e bele hala'o iha workshop badak ida nia laran (oras 1 – 3 depende ba número participante sira no mós se karik membru komunidade sira, nu'udar parte husi ekipa auditoria sosiál iha futuru ka pontu fokál ruma, hetan konvida atu partisipa).



SUJESTAUN – Komunidade sira la hanesan, tanba ne'e importante atu envolve reprezentante oioin, inklui grupu vulneravel ka grupu minoritáriu, hanesan: feto, ema ho defisiénsia, komunidade sira iha área remota no foin-sa'e sira inkluidu nu'udar parte husi prosesu.

1.4 Hametin komunidade nia envolvimentu

Tanbasá ida-ne'e importante?

Komunidade sai parte sentrál iha auditoria sosiál no importante katak membru komunidade hetan apoiu hodi partisipa ho ativu iha prosesu ne'e no mós lidera etapa prinsipál sira husi auditoria sosiál ho apoiu husi organizasaun sosiedade sivil. Ba ema ordináriu atu partisipa, sira presiza hetan suporta.

Parte interesada sira hotu iha responsabilidade ba kualidade no servisu sustentavel sira, inklui membru komunidade sira. Nu'udar exemplu, inan-aman sira iha papel ida atu suporta oan sira nia edukasaun; grupu jestór bee sira iha papel ida atu mantein fornesimentu bee ida ne'ebé funsiona; membru komunidade sira iha papel ida atu asegura sira nia saúde rasik no saúde sira nia membru familia sira. Auditoria sosiál bele haforsa envolvimentu no responsabilidade komunidade.

Saida mak Ita presiza atu halo?

Iha dalan oioin hodi harii komunidade nia partisipasaun:

- Hametin envolvimentu husi grupu, komisaun ka rede sira ne'ebé eziste ona iha komunidade. Nu'udar parte husi Ita nia análise ba parte interesada sira, tenke identifika grupu hirak-ne'e. Di'ak liu servisu ho grupu hirak-ne'e nu'udar parte husi siklu auditoria sosiál prosesu - la'ós kria grupu foun

- Apoia ema lokál atu lidera auditoria sosiál liuhosi servisu ho lider lokál sira iha komunidade hanesan Xefe Aldeia, Konsellu Suku, Lider Igreja, reprezentante foin-sa'e no lider feto
- Fó treinamentu ba indivíduu no grupu indivíduu sira hodi lidera siklu auditoria sosiál – haree Etapa 2.2 iha okos, ne'ebé deskreve ‘Organiza ekipa auditoria sosiál no Pontu Fokál sira’.

Edukasaun ba sidadaun sira

Hodi ajuda komunidade atu envolve an iha prosesu auditoria sosiál, edukasaun ba sidadaun sira bele ajuda. Edukasaun ba sidadaun sira signifika hasa'e konxiénsia no hasa'e sidadaun sira-nia komprensaun kona-ba sira-nia direitu no responsabilidade no oportunidade hodi partisipa iha governasaun no dezenvolvimentu nasionál. OSS sira iha Timor-Leste fó edukasaun oioin ba sidadaun sira no bele uza ida-ne'e iha sira-nia auditoria sosiál. Tópiku sira ne'ebé relevante hodi fó edukasaun ba sidadaun sira iha auditoria sosiál bele inklui:

- Estrutura Governu, sistema governu no prosesu sira
- Autoridade, Governu nia responsabilidade no prosesu foti desizaun
- Akontabilidade no governasaun di'ak
- Sidadaun sira-nia direitu, no responsabilidade koletiva
- Oportunidade no responsabilidade ba sidadaun sira atu partisipa.

Formatu sira ba edukasaun ba sidadaun inklui:

- Diálogu, workshop, sorumetu, forum sira
- Prosesu informál sira
- Rádiu no televizaun

Edukasaun ba sidadaun sira bele hala'o liuhosi workshop, sorumetu, forum ka siklu informál sira. Labele haree nu'udar atividade ida de'it, maibé nu'udar prosesu tempu naruk. Edukasaun ba sidadaun sira akontese durante prosesu auditoria sosiál bainhira ema sira partisipa iha faze sira no kontinua depois siklu remata.

Hametin komunidade nia envolvimentu liuhosi edukasaun ba sidadaun sira nu'udar etapa ida iha prosesu auditoria sosiál maibé iha impaktu luan liu, aleinde iha siklu auditoria sosiál.

Ita bele envolve pesoál político no administrativu oioin [Konsellu Suku no Xefe Suku, reprezentante sira husi nível Munisépiu, funzionáriu públiku hanesan profesór ka doutór ne'ebé servisu iha komunidade] hodi ajuda esplika Governu nia papel no obrigasaun sira no mós komunidade nia direitu no responsabilidade sira.

Mobilizasaun ba sidadaun sira

Bele halo mobilizasaun ba sidadaun sira nu'udar rezultadu husi edukasaun ba sidadaun sira. Bainhira sidadaun sira hatene kona-ba Governu nia papél, sira-nia direitu no responsabilidade sira, no oportunidade hodi hola parte iha governasaun no dezenvolvimentu, sira iha probabilidade boot liu atu sai ativu no envolvidu.



SUJESTAUN - Obstáculo ida ne'ebé OSS barak iha Timor-Leste hasoru mak identifika voluntariu sira iha nível lokál atu sai pontu fokál no membru komisaun. Dala barak iha espektasaun ba pagamentu bainhira involve iha programa ruma. Halao edukasaun ba komunidade; uza insrumentu sira ne'ebé appropriadu ba komunidade, servisu ho komisaun ne'ebé eziste ona no pontu fokál sira no buka hetan 'buat ne'ebé bele manan lais' atu hatudu rezultadu pozitivu auditoria sosiál bele tulun atu motiva partisipasaun no hakat-liu obstáculo ida ne'e.

Bainhira mak Ita tenke halo ida-ne'e?

Ita tenke hahú mobilizasaun ba komunidade bainhira Ita completa revizaun ba dokumentu sira no análise ba parte interesada sira. Maibé, tenke kontinua halo ida-ne'e durante prosesu auditoria sosiál tomak.

Durasaun: Ida ne'e etapa importante ida ne'ebé la presiza ansi. Ida ne'e bele han tempu semana 2 – 4 maibe Ita presiza prepara-an atu aumenta tan tempu barak se karik presiza atu asegura katak prosesu ida ne'e inkluzivu ba grupu no individual oioin iha komunidade, espesialmente grupu marginalizadu no vulneravel sira.

Sei hamosu rezultadu saida de'it?

Se Ita halo etapa ne'e ho efetivu, Ita nia auditoria sosiál sei hetan envolvimentu forte husi komunidade, inklui lider komunidade sira no grupu komunidade baze sira. Ida-ne'e sei ajuda sira atu sai na'in no lidera prosesu auditoria sosiál iha futuru.



Imagen 4: Komunidade sira sai hanesan lider ba prosesu



Ezemplu kona-ba práтика di'ak: Apoia komunidade hodi sai na'in ba prosesu

Auditoria sosiál tenke envolve komunidade tomak no sei efikás liu bainhira membru komunidade bele lidera rasik prosesu ne'e. Ida-ne'e signifika:

- servisu metin ho reprezentante komunidade ho nune'e sira hatene importânsia no benefísiu sira husi auditoria sosiál
- fó treinamentu ba membru komunidade hodi uza instrumentu auditoria sosiál no kontinua ida-ne'e husi tempu ba tempu hodi kapasita sira atu bele lidera rasik
- eduka komunidade kona-ba sidadania, direitu, responsabilidade no sira-nia papel importante iha dezenvolvimentu nasionál ho nune'e sira la sente katak Governu ka doadór mak nain ba projetu, maibé sira komunidade mak sai na'in ba projetu sira.

OSS balun uza dalan partikulár hodi apoia komunidade sira atu partisipa ho ativu no lidera prosesu auditoria sosiál. ONG **Mata-Dalan Institute (MDI)** hahú ho mobiliza komunidade liuhosi sorumutu ho membru komunidade no lider komunidade hodi esplika objetivu sira husi programa auditoria sosiál. Sorumutu ne'e fó espasu ba komunidade hodi esplika oinsá sira envolvidu ona iha projetu no programa sira no diskute oinsá auditoria sosiál bele sai nu'udar esperiênsia pozitiva. Ida-ne'e ajuda hodi enkoraja sira-nia partisipasaun ativa no oinsa MDI no komunidade bele lao hamutuk. Iha sorumutu ne'e, grupu ida eleitu nu'udar Grupu Monitorizasaun ne'ebé Bazeia iha Komunidade (GMBK). Grupu ne'e aprende oinsá tenke uza instrumentu sira, hala'o auditoria sosiál ho MDI. GMBK komunika rezultadu sira husi auditoria sosiál ba ema hotu-hotu iha komunidade.

1.5 Hetan envolvimentu husi autoridade no fornesedór servisu sira

Tanbasá importante?

Hetan envolvimentu husi autoridade atu partisipa iha siklu auditoria sosiál ne'e esensiál. Ema hirak ne'e mak sira ne'ebé bele halo mudansa no responde ba rezultadu sira husi auditoria sosiál.

Saida mak Ita presiza atu halo?

Iha dalan oioin hodi bele estabelese envolvimentu.

Importante katak Ita asegura katak pesoál governu lokál iha interese no kompromisu atu envolve an, tantu iha área administrativa no mos política. Ita presiza hetan aprovasaun lokál ida ne'e hodi hahú prosesu iha faze inisiál. Mezmu MdE ba auditoria sosiál ezisti iha nível nasionál, ida ne'e mos presiza atu komunika ba nível lokál no akordu ne'ebé halo atu hala'o auditoria sosiál iha nível lokál.

Importante tebes atu kria espasu seguru ba auditoria sosiál. Bainhira komunika ho komunidade no Governu kona-ba auditoria sosiál, importante hodi esplika klaru katak ida ne'e mak oportunidade atu halo diálogu (fahe informasaun no ko'alia ba malu), hasa'e komprensaun kona-ba perspetiva diferente no hametin relasaun sira. Prosesu ne'e iha objetivu hodi hasa'e relasaun, kompromisu no responsabilidade husi sidadaun sira no mós ne'ebé servisu hamutuk hodi hadi'ak Governu nia servisu sira.

Bainhira mak Ita tenke halo ida-ne'e?

Depois determina foku ba auditoria sosiál no hili fatin, tenke hala'o sorumutu sira ho komunidade, autoridade lokál (inklui autoridade sira iha nível suku, membru governu iha nível Munisípiu), fornesidór servisu ka kontraktór hodi esplika prosesu auditoria sosiál hanesan determina iha Matadalan ne'e.

Tanba pesoál governu ka kontraktór normalmente sei okupadu hodi hala'o sira-nia devér, importante atu planeia tempu appropriadu hodi garante sira-nia partisipasaun iha auditoria sosiál, ho nune'e fornesedór servisu ka kontraktór barak liu posivel bele partisipa.

Durasaun: Ida ne'e sei han tempu semana 1 – 3 maibe prepara-an ba tempu ne'ebé naruk liután no konsistente atu asegura katak Ita hasoru ona autoridade no fornesedór servisu sira ne'ebé importante atu bele hetan interesse no komitmentu ba auditoria sosiál.

Sei hamosu rezultadu saida de'it?

Hetan kompromisu atu partisipa husi lider komunidade importante no grupu sira ne'ebé bazeia ba komunidade no mós envolvimentu voluntáriu husi membru Governu, fornesedór servisu ka Governu nia sub-empreiteiru sira.



SUJESTAUN – Auditoria sosiál iha objetivu hodi hametin relasaun no ligasaun sira entre sidadaun no Governu. Importante atu kria espasu ida ne'ebé seguru no pozitivu. Komunika ba parte interesada hotu-hotu katak auditoria sosiál la'ós fatin ida hodi halo konfrontasaun, tau sala ka atake pesoál, maibé foka ba asaun koletiva hodi hadi'ak Governu nia servisu, programa no projetu sira.



SUJESTAUN – Refere ba rezultadu sira husi mapeamentu ba parte interesada sira hodi identifika parte interesada ne'ebé importante, atu bele hetan interesse no komitmentu atu partisipa.



Ezemplu kona-ba práтика di'ak: Harii relasaun ho autoridade sira

Auditoria sosiál bele sai efikás liu no iha probabilidade boot liu sei hadi'ak programa no servisu sira karik envolve autoridade governu ne'ebé relevante iha faze inisiál husi siklu. Ida-ne'e signifika:

- Identifika autoridade ne'ebé relevante liu hotu (iha nível Nasionál, Munisípiu no lokál) molok hahú auditoria sosiál
- Garante katak membru autoridade sira-ne'e iha kompromisu ba prosesu ne'e, apresia benefísiu husi auditoria sosiál ba sira-nia servisu rasik no iha kompromisu hodi foti asaun bazeia ba konkluaun sira
- Hasoru malu ho autoridade sira iha faze inisiál no ko'alia ho sira/fahe informasaun durante siklu auditoria sosiál tomak.
- Hasoru malu hodi diskute rekomendasau sira hodi ajuda sira identifika asaun ne'ebé sira bele foti.

Molok sira hahú auditoria sosiál, **Luta Ba Futuru** hasoru malu ho autoridade sira iha nível suku (Xefe no Konsellu Suku) no nível Munisípiu (reprezentante sira husi departamentu relevante). Sira estabelese Konsellu Diretiva no enkoraja Prezidente Munisípiu ka Administradór atu prezide konsellu ne'e. Ida-ne'e ajuda hodi garante katak informasaun husi auditoria sosiál sei kanaliza ba Ministériu ne'ebé loos. Ida-ne'e mós fó lejitimidade ba prosesu.

FAZE 2 – IMPLEMENTA AUDITORIA SOSIÁL

2.1 Hili instrumentu sira hodi hala'o auditoria sosiál

Tanbasá ida-ne'e importante?

Tenke hili didi'ak instrumentu sira ba auditoria sosiál ho nune'e bele appropriadu ba objetivu ita nia auditoria sosiál no kria rezultadu ne'ebé efetivu. Se instrumentu la appropriadu ka efetivu, evidénsia sei la forte, komunidade bele ladún envelopidu no ema sira ne'ebé hola desizaun dala ruma sei la responde ba rekomendasau sira.

Saida mak Ita presiza atu halo?

Iha instrumentu lubuk ida ne'ebé bele uza hodi halibur informasaun ba siklu auditoria sosiál. Matadalan ne'e fó instrumentu balu ne'ebé uza tiha ona iha Timor-Leste. Dala ruma instrumentu konveniente liu mak la'ós instrumentu di'ak liu hotu atu uza. Haree instrusaun hodi hili instrumentu sira.

Nota: OSS balu iha Timor-Leste uza Kartaun Pontuasaun Komunidade ida ne'ebé mak kombinasaun husi instrumentu 3 ne'ebé esbosa iha Matadalan ida ne'e; Buka Tuir Rekursu (*input-tracking*); Grupu Foku ba Pontuasaun; no instrumentu Sorumutu Interfase.

Importante atu hili instrumentu ne'ebé los no atu hili kombinasaun instrumentu oioin atu hari'i baze evidensia forte ba rekomendasau sira ne'ebé rezulta husi ita nia prosesu auditoria sosiál.

PROSESU 3: Hili instrumentu hodi halibur dadus

Bainhira mak Ita tenke halo ida-ne'e?

Molok hili instrumentu, tenke halibur informasaun, revee Governu nia dokumentu sira no mós halo mapeamentu ba parte interesada sira. Tenke hili instrumentu molok identifika no fó treinamentu ba ekipa auditoria sosiál no pontu fokál sira.

Durasaun: Etapa ida ne'e bele hala'o iha workshop badak ida nia laran (oras 1 – 3 depende ba número partisipante sira no mós se karik membru komunidade sira, nu'udar parte husi ekipa auditoria sosiál iha futuru ka pontu fokál ruma, hetan konvida atu partisipa).

Sei hamosu rezultadu saida de'it?

Tenke hola desizaun kona-ba instrumentu ida-ne'ebé sei uza nu'udar parte husi auditoria sosiál. Ida-ne'e sei ajuda ita atu prepara instrumentu (sira) ba kontestu lokál, bazeia ba servisu, programa ka projetu ne'ebé hili ona no mós fó treinamentu ba ekipa auditoria sosiál kona-ba uza instrumentu (sira).

2.2 Organiza no fó treinamentu ba ekipa auditoria sosiál no Pontu Fokál sira

Tanbasá ida-ne'e importante?

Membru sira husi komunidade lokál tenke lidera auditoria sosiál no tenke buka voluntáriu sira husi komunidade laran. Importante mós hodi hanoin kona-ba prosesu atu hili voluntáriu sira ho nune'e la esklui ema ruma husi komunidade ne'ebé dala ruma interesadu.

Saida mak Ita presiza atu halo?

Hala'o sorumutu boot ho komunidade, ho reprezentante sira husi grupu oioin iha komunidade. Liuhosi kolaborasaun ho komunidade, estabelese kritériu no prosesu hodi hili voluntáriu sira. Importante katak maioria membru iha komunidade fó apoiu ba Pontu Fokál.

PROSESU 4: Organiza no fó treinamentu ba ekipa auditoria sosiál no Pontu Fokál sira



SUJESTAUN – *Di'ak liu atu defini kritériu hodi hili ekipa auditoria sosiál / pontu fokál sira hamutuk ho komunidade. Ho nune'e kritériu ne'e relevante no apropiadu ba komunidade lokál.*



SUJESTAUN – *Importante katak ita envolve grupu membru komunidade ida ne'ebé luan inklui grupu vulneravel sira iha faze inisiu husi prosesu ne'e hodi nune'e sira bele hetan formasaun iha auditoria sosiál no sira sai parte ne'ebé hala'o auditoria sosiál.*



SUJESTAUN – *Importante atu buka hatene se karik komisaun ezistente ruma iha nivel lokál bele hola responsabilidade ba auditoria sosiál. Ezemplu balun inklui komisaun inan-aman ba eskola primaria ida; komisaun ba utilizadór bee; grupu monitorizasaun baze ba programa, projetu ka servisu ida. Grupu hirak ne'e iha mandatu ezistente ida atu jeree no monitoriza servisu, programa ka projetu sira no nu'udar parte husi papel ida ne'e bele inklui hanesan auditoria sosiál.*

Auditoria sosiál bele hamosu risku ba membru komunidade sira, espesialmente bainhira involve asuntu político ka sosiál ne'ebé sensitivu. Servisu ho grupu lokál hirak ne'e haforsa lejitimasaun auditoria sosiál no bele hamenus risku ba membru komunidade sira.

Bainhira mak Ita tenke halo ida-ne'e?

Ita bele organiza ekipa auditoria sosiál ida / Pontu Fokál iha prosesu inisiu atu hala'o Faze 1 hamutuk ho pesoál OSS, ka bainhira kapasidade lokál aumenta iha sira nia-an rasik. Formasaun ba halibur dadus auditoria sosiál presiza akontese hafoin deside tiha ona instrumentu, maibe molok ita halibur dadus.

Durasaun: Ida ne'e sei han tempu semana 1 – 2 maibe prepara-an ona atu aumenta tan tempu hodi asegura katak prosesu ne'e inkluzivu ba komunidade hotu, espesialmente grupu marjinalizadu no vulneravel sira.



Ezemplu kona-ba práтика di'ak: Garante grupu vulneravel sira-nia partisipasaun

RDTL nia Planu Estratéjiku 2015-2030 halista grupu vulneravel hanesan tuir mai: feto sira ne'ebé iha risku atu hetan abuzu; labarik; veterano; ferik-katuas; ema ho defisiénsia; família kiak no vítima dezastre naturál. Grupu hirak-ne'e hotu mak prezente iha komunidade hotu-hotu iha Timor-Leste no tenke inklui iha auditoria sosiál ho nune'e rezultadu sira hatudu ema hotu-hotu nia esperiénsia. Ida-ne'e signifika:

- Inklui objetivu espesífiku hodi inklui grupu vulneravel bainhira halo planu auditoria sosiál
- Identifika grupu vulneravel oioin ne'ebé moris iha komunidade ka hola parte iha projetu, programa ka servisu ne'ebé Ita foka ba
- Foti asaun hodi enkoraja no permite grupu vulneravel sira atu partisipa
- Konsulta ho organizasaun sira ne'ebé servisu ho grupu vulneravel hodi hetan hanoin kona-ba asaun efetiva ne'ebé bele foti.

AcBIT nia programa sira envolve feto sira ne'ebé sofre tanba funu no konflitu. Organizasaun ne'e rekoñese katak dala barak ema husu feto hirak-ne'e atu konta sira-nia istória maibe sira seidauk hetan rezultadu di'ak. Tanba ne'e susar ba sira atu partisipa iha atividade no programa sira. **AcBIT** uza métodu partisipativu sira, nu'udar ezemplu mapeamentu ba rekursu sira no istória ho foto, hodi tulun feto sira sente seguru, ema seluk respeita sira no livre atu fahe sira-nia hanoin. **AcBIT** garante katak feto sira envelopidu hodi buka solusaun ba problema sira. Importante katak programa sira deklaru momoos nesesidade atu inklui feto sira, maske bele fasil ka lailais liu atu envolve mane sira.

Sei hamosu rezultadu saida de'it?

Ida-ne'e ajuda hodi garante katak siklu auditoria sosiál sei kontinua no pontu fokál sira ne'ebé bazeia ba komunidade no ekipa auditoria sosiál sei iha kapasidade no konfiansa boot liu hodi hala'o prosesu bazeia ba sira-nia treinamentu no esperiénsia.



Imajen 5: Asegura partisipasaun ba grupu vulneravel

2.3 Uza instrumentu sira hodi halibur dadus

Tanbasá ida-ne'e importante?

Ida-ne'e etapa importante tebes iha auditoria sosiál! Iha faze ne'e ita halibur dadus ne'ebé bele sai evidénsia. Tuir mai sei uza evidénsia ne'e hodi fó komentáriu no rekomenda hadi'ak ba servisu, programa ka projetu.

Saida mak Ita presiza atu halo?

Ita tenke implementa instrumentu sira ne'ebé Ita hili ona liuhosi servisu metin ho ekipa auditoria sosiál no pontu fokál sira iha comunidade.

Bainhira mak Ita tenke halo ida-ne'e?

Tenke halibur dadus depois ekipa auditoria sosiál hetan treinamento no informasaun ne'e tenke completa molok lori hamutuk parte interesada hotu-hotu hodi diskute rezultadu no asaun durante Sorumutu Interfase.

Durasaun: Implementasaun instrumentu sira sei han tempu ne'ebé la hanesan depende ba instrumentu. Hamutuk hotu, faze halibur dadus bele han tempu semana 4 - 6 atu asegura katak faze ida ne'e halo ho didi'ak.

Sei hamosu rezultadu saida de'it?

Rezultadu ne'e mak dadus ho kualidade aas no kredivel hodi estabelese evidénsia no hodi prepara rekomendasau sira kona ba oinsa hadi'ak.



Imajen 6: Akontabilidade



INSTRUMENTU 1: Buka Tuir Orsamentu



INSTRUMENTU 2: Buka Tuir Rekursu



INSTRUMENTU 3: Grupu Foku ba Pontuasaun



INSTRUMENTU 4: Levantamentu Auditoria Sosiál

2.4 Sorumutu Interfase no planeia asaun

Tanbasá ida-ne'e importante?

Ida-ne'e oportunidade hodi lori hamutuk ema oioin ne'ebé envolvidu iha setór, programa, projeto ka servisu hodi reevee rezultadu sira husi auditoria sosiál no diskute asaun no solusaun ruma ne'ebé bele hala'o hamutuk. Parte importante husi auditoria sosiál mak asaun hamutuk no kompromisu hamutuk.



SUJESTAUN - Enkoraja parte interesada hotu-hotu ne'ebé envolvidu iha auditoria sosiál hodi foti responsabilidade ba asaun sira hodi fó atensaun ba kestaun sira ne'ebé mosu iha auditoria sosiál.

Saida mak Ita presiza atu halo?

Ita tenke organiza partisipante sira, fatin, tempu no loron, no garante katak iha ajenda no planu fasilitasaun ne'ebé forte ba Sorumutu Interfase. Ita tenke fasilita ida-ne'e ho nune'e parte interesada ida-idak sei foti responsabilidade ba asaun diferente

- Asaun sira ne'ebé sidadaun sira lidera
- Asaun sira ne'ebé funzionáriu públiku lokál sei lidera – governu nia fornesedór servisu ka empreiteiru
- Asaun sira ne'ebé administrasaun sei lidera – iha nível Munisípiu ka Nasional.



INSTRUMENTU 5: Sorumtu Interfase no planu asaun

Bainhira mak Ita tenke halo ida-ne'e?

Ita tenke garante katak halibur no analiza dadus molok hala'o Sorumtu Interfase.

Durasaun: Etapa ida ne'e menus husi semana 1, maibe karik kleur liután hodi prepara ba enkontru inklui analize dadus no asegura katak partisipante ne'ebé los atende enkontru.

Sei hamosu rezultadu saida de'it?

Tenke hamosu rezultadu ida katak ema hotu-hotu ne'ebé envolvidu hatene kona-ba rezultadu husi auditoria sosiál no simu ka kestiona rezultadu hirak-ne'e. Partisipante sira iha Sorumtu Interfase tenke iha komprensaun di'ak liu kona-ba ida-idak nia perspektivu. Rezultadu-xave husi Sorumtu Interfase mak planu asaun ne'ebé hatuur oinsá bele hadi'ak servisu, programa ka projetu. Planu asaun tenke hatuur mós papél no responsabilidade sira ne'ebé importante no data sira hodi hala'o asaun sira.



Imajen 7: Ita hotu halo komitmentu ba planu asaun ida.



SUJESTAUN – Bele lida ho kestaun sosiál no político barak iha nível lokál hodi buka solusaun ida. Bele hetan rezultadu ne'e husi prosesu foti desizaun ne'ebé komunidade lidera rasik no inklui atór sira iha nível lokál ne'ebé envelopidu iha projetu, programa ka servisu. Dala ruma ema ne'ebé besik liu, no afetadu tebes husi kestaun sira mak iha pozisaun di'ak liu hotu hodi fó atensaun ba kestaun sira.

Bainhira la bele fó atensaun ba kestaun ida iha nível lokál – tenke hato'o ba nível aas liu- ba ema seluk ne'ebé kaer podér no ema sira ne'ebé hola desizaun ka iha obrigasaun hodi rezolve situasaun. Maske nune'e, keta haluha, katak sidadaun hotu-hotu iha direitu atu hato'o keixa ba governu kona-ba korupsaun ka violasaun governasaun di'ak no direitu umanu, lokalmente ka iha nível ne'ebé a'as liután.



Ezemplu kona-ba práтика di'ak: Uluk liu fó atensaun ba kestaun ne'e iha nível lokál

Importante hodi buka dalan hodi rezolve kestaun sira ne'ebé identifika liuhosi auditoria sosiál iha fatin ne'e kedas, ka besik liu fatin ne'e. Ida-ne'e bele ajuda hodi hadi'ak kedas situasaun ne'e. Ida-ne'e signifika:

- Molok entrega rekomendasau sira ba autoridade iha nível Munisípiu ka Nasional, konsidera posibilidade atu rezolve kestaun ne'e iha nível lokál.
- Lori hamutuk atór sira ne'ebé diretamente envelopidu iha problema ne'e, hamutuk ho membru komunidade hodi haree sira bele servisu hamutuk ka lae hodi buka solusaun ida.
- Koko atu rezolve kestaun ne'e uluk liu iha nível lokál molok hato'o kestaun ne'e ba nível aas liu.
- OSS balu uza 'Sorumutu Interfase' hodi lori hamutuk komunidade, autoridade Governu nian no empreiteiru ka fornesedór programa hodi diskute rezultadu sira husi auditoria sosiál.

Luta Hamutuk hala'o papél nu'udar mediadór durante Sorumutu Interfase hodi ajuda rezolve problema ho implementasaun projetu, nu'udar exemplu, asesu ba eletrisidade. Sorumutu sira ajuda ema hotu-hotu komprende problema ne'e di'ak liu tan. Dala ruma ema sira ne'ebé prezente ona iha komunidade bele rezolve problema ne'e lailais. Karik la bele rezolve problema ho dalan ida-ne'e, bele hato'o ba nível Munisípiu ka Nasional.

FAZE 3 – HALO PROMOSAUN BA REFORMA SIRA

3.1 Komunika rezultadu (**findings**) sira

Tanbasá ida-ne'e importante?

Iha benefísiu oioin bainhira komunika konkluzaun no rekomendasau nia ba asaun:

- Subliña servisu di'ak ne'ebé Governu ka kontarktór halo tiha ona
- Subliña área sira ne'ebé presiza hadi'ak no asaun sira ne'ebé rekomenda ona
- Promove transparénsia ho disponibiliza rezultadu sira ba públiku
- Enkoraja parte interesada oioin hodi akompaña konkluzaun no rekomendasau sira no halo promosaun hodi komunidade nia naran

Saida mak Ita presiza atu halo?

Ita tenke hakerek relatóriu finál ba auditoria sosiál.

PROSESU 5: Hakerek relatóriu finál kona-ba auditoria sosiál

Ita tenke mós prepara komunikasaun ho tipu seluk ho konsiderasaun ba audiénsia oioin no dalan di'ak liu hodi komunika ho sira hodi influensia mudansa. Bele dezenvolve planu advokasia hodi garante ita nia esforsu sira sei estratéjiku, iha fokus duni no iha probabilidade di'ak liu hodi realiza mudansa.

Bainhira mak Ita tenke halo ida-ne'e?

Ita presiza hakerek relatóriu final hafoin Ita halibur, analiza no apresenta dadus ba sorumutu interfase.

Durasaun: Presiza semana 3 – 4 atu hakerek relatóriu final. Relatóriu ne'e di'ak liu badak deit. Sei han tempu barak liután se Ita deside atu valida relatóriu ne'e iha nível komunidade no/ka ho parte interesada xave sira molok Ita kompleta versaun final.



SUJESTAUN - Ho másimu posivel, servisu ho komunidade ne'ebé envolvidu iha auditoria sosiál bainhira halo esforsu advokasia. Parte importante husi auditoria sosiál no advokasia mak inklui sidadaun sira iha diálogu no envolvimentu diretu ho ema sira ne'ebé hola desizaun.

Sei hamosu rezultadu saida de'it?

Konkluzaun sira husi auditoria sosiál sei fahe ho parte interesada oioin iha nível oioin, inklui iha komunidade, iha nível Munisípiu no iha nível nacionál ne'ebé bele influensia mudansa.

3.2 Halo advokasia ba reforma sira

Tanbasá mak ida-ne'e importante?

Maski sidadaun sira bele identifika nesesidade atu foti asaun, baibain sira laiha podér ka autoridade hodi realiza ida-ne'e. Sira depende ba Governu no funzionáriu públiku hodi responde no foti asaun hodi realiza mudansa ne'ebé sira hakarak. Sidadaun sira tenke foti asaun individual no koletiva hodi influensia mudansa.

Saida mak Ita presiza atu halo?

Tenke identifika asaun no rekomendasau sira ne'ebé nesesáriu hodi realiza mudansa. Ita tenke foka ba ema sira ne'ebé apropriadu nu'udar parte husi advokasia. Tenke servisu ho ema seluk iha rede sira no koligasaun sira hodi hala'o advokasia.

Iha momentu ne'e importante atu aumenta no troka mapeamentu ba parte interesada sira hodi comprende di'ak liu kona-ba podér no hodi identifika alvu sira ne'ebé apropriadu ba advokasia no influénsia.



Imajen 8: Advokasia

PROSESU 6: Planu Advokasia ba Asaun no Rekomendasau sira



SUJESTAUN - Hahú ho 'susesu lailais' - mudansa ne'ebé fasil atu hetan hodi hadi'ak servisu sira - dalañ di'ak ida hodi enkoraja sidadaun sira-nia asaun iha faze inisiál no hodi konsolida susesu ba asaun durante tempu naruk.



Ezemplu kona-ba práтика di'ak: Buka 'susesu lailais':

Importante katak komunidade, sosiedade sivil no governu kontinua tane aas sira-nia kompromisu ba auditoria sosiál iha futuru. Hodi fó motivasaun ba atór hotu-hotu ne'ebé envolvidu, bainhira posivel koko atu hetan 'susesu lailais' (maibé labele dada atensaun husi problema ne'ebé boot liu). Bainhira hetan 'susesu lailais' sei ajuda komunidade fiar ba prosesu auditoria sosiál no sei hatudu ba governu katak prosesu ne'e bele ajuda sira-nia servisu. Ida-ne'e signifika:

- Identifika kestaun ida ne'ebé ladún difisil atu hadi'ak.
- Relata kestaun ne'e ba autoridade relevante
- Halo akompañamentu hodi garante katak bele rezolve lailais.
- Celebra no fahe susesu ne'e ho parte interesada oioin inklui membru komunidade no reprezentante sira husi governu

Iha 30 Marsu 2016, **Unidade Auditoria Sosiál** simu keixa ida liuhosi Facebook kona-ba paseiu ida ne'ebé aat iha Praia dos Kokeirus, Dili. Iha 1 Abríl, UAS verifika keixa ne'e ho vizita ba fatin. Tuir mai UAS entrega Relatório Verifikasiun ba Ministério das Obras Públicas, Transportes e Comunicações iha 4 Abríl 2016. Iha 5 Maiu, UAS vizita fatin no haree katak kompañia hadi'ak tiha ona paseiu ne'e.

Bainhira Ita tenke halo ida-ne'e?

Ita bele hahú esforsu advokasia bainhira apresenta ona rezultadu no diskute planu asaun durante Sorumutu Interfase. Ida-ne'e signifika katak Ita nia advokasia bazeia ba hanoin no nesesidade husi komunidade sira. Maibé, advokasia nu'udar prosesu ba tempu naruk. Tenke **persistente** hodi influensia mudansa ba tempu naruk. Dala barak labele hetan mudansa imediata no han tempu atu hetan resposta husi governu. Iha nesesidade atu mantein motivasaun ba asaun **persistente**, liuliu iha komunidade.

Durasaun: Ita tenke komunika rezultadu (findings) sira husi auditoria sosiál imediatamente. Ita tenke mós servisu hamutuk ho FONGTIL - ReNAS no UAS atu asegura katak rezultadu sira submete ba Ministériu relevante antes **fulan Abril kada tinan**. Ida ne'e sei tulun rezultadu sira atu informa prosesu planeamentu orsamentu. Advokasia ne'e mós prosesu tempu naruk ida, tan ne'e ita nia esforsu advokasia sira seluk mós sei han tempu naruk!



SUJESTAUN - Servisu ho membru komunidade hodi monitoriza susesu no progresu kona-ba asaun sira. Ida-ne'e bele ajuda hodi motiva ekipa no parte interesada sira no mós identifika problema no estratéjia foun hodi halo advokasia.

Sei hamosu rezultadu saida de'it?

Karik Ita nia advokasia mak efikás, sei hetan mudansa! Bainhira realiza asaun sira, celebra susesu. Rekoñese no celebra asaun husi funzionáriu pùbliku ne'ebé ajuda hodi realiza mudansa ne'e. Garante katak komunidade jerál hatene kona-ba sira-nia asaun. Celebra partisipasaun no kompromisu husi sidadaun baibain. Subliña katak bainhira ema baibain mak ativu no iha kbiit, no mos parte interesada servisu hamutuk, bele hetan mudansa.



Ezemplu kona-ba práтика di'ak: Advokasia

Advokasia ne'ebé efikás bele realiza mudansa reál. Iha advokasia ho tipu oioin. Advokasia mak forte liu bainhira:

- Ema hotu bele fier konkluzaun sira husi prosesu auditoria sosiál, no konkluzaun sira bazeia ba rekolla informasaun no avaliaun iha komunidade ho parte interesada hotu-hotu nia partisipasaun
- Rekomendasaun sira klaru no mós klaru sé mak tenke foti asaun
- Koligasaun organizaun ne'ebé servisu hamutuk iha nivel oioin
- Envolve mídia no fahe informasaun ba pùbliku
- Inklui mós harii relasaun ho funzionáriu pùbliku ne'ebé tuir mai responde ba liamenon sira advokasia nian

Plataforma Nasional ba Bee no Saneamentu (PN BESI TL) harii iha 2014 no iha komunikasaun no relasaun transparente ho departamentu relevante iha Ministériu das Obras Públicas. Ida-ne'e permite sira atu sai envolvidu durante prosesu prestasaun servisu, nu'udar ezemplu, hodi dezenvolve indikadór sira. Iha nível nasional, sira apoia dezenvolvimentu política. Iha nível Munisípiu, pesoál sira husi Postu Administrativu hasoru malu ho PN BESI TL no simu rekomendasaun sira ne'ebé mai husi auditoria sosiál. Sira hatete; "Iha tempu pasadu, ita kritika malu, maibé agora ita servisu hamutuk." Plataforma ne'e mós hala'o sensibilizasaun no envolvimentu mídia ba Loron Fase Liman, Loron Saneamentu no Loron Mundial Bee nian.

3.3 Planeia siklu tuir mai

Tanbasá mak ida-ne'e importante?

Auditoria sosiál la'ós atividade ne'ebé halo dala ida de'it. Hodi masimiza melloramentu kontínuu no rezultadu di'ak husi governu nia servisu, programa no projeto sira, presiza komunidade nia envolvimentu regulár iha auditoria sosiál.

Bainhira mak Ita tenke halo ida-ne'e?

Iha rekomendasau hodi hala'o auditoria sosiál kada fulan neen ka kada tinan ba servisu sira ne'ebé kontínuu ka governu nia programa sira. Ita bele refere fila-fali siklu antes bainhira Ita prepara siklu tuir mai.

Saida mak Ita presiza atu halo?

Ita bele konsidera nu'udar parte husi planeamento ba siklu tuir mai

- Halo treinamentu-resiklajen ba ekipa auditoria sosiál komunidade nian / pontu fokál sira
- Rekruta membru foun ba ekipa auditoria sosiál / pontu fokál sira
- Garante katak Ita repete Faze 1 – ho nune'e funzionáriu públiku foun kompriende no iha kompromisu ba prosesu auditoria sosiál.
- Halo revizaun hamutuk ho OSS no parte interesada sira seluk iha maneira ida ne'ebé partisipatóriu. Ida ne'e sei tulun atu hadi'ak práтика no fahe aprendijaben.

5. PROSESU NO INSTRUMENTU

PROSESU 1 – Oinsá bele hetan asesu ba Governu nia dokumentu sira

Etapa 1: Identifika dokumentu sira ne’ebé Ita presiza hodi kompleta Ita nia auditoria sosiál bazeia ba servisu, programa ka projeto ne’ebé Ita foka ba. Dala ruma la fasil hodi buka dokumentu sira no tuir mai identifika informasaun klara ne’ebé sei uza iha auditoria sosiál. Se karik bele, servisu ho funzionáriu administrasaun nian durante prosesu ne’e, tanba sira bele ajuda buka informasaun ne’ebé nesesáriu no loloos.

Etapa 2: Asesu dokumentu sira uza gia tuir tabela iha okos ne’e. Se Ita labele hetan rasik dokumentu ne’e ka liuhosi pedidu informál ba governu, koko prosesu tuir mai¹:

- Identifika departamentu ka funzionáriu ne’ebé iha informasaun ne’ebé Ita presiza
- Hakerek karta ne’ebé esplika momoos dokumentu ka informasaun ne’ebé Ita husu (hakerek karta ne’e ho simples)
- Espesifika formatu dokumentu ne’ebé Ita presiza (surat-tahan ka eletróniku)
- La presiza esplika tanbasá Ita presiza informasaun ka sei uza informasaun ne’e ba saida de’it
- Dirije karta ne’e ba membru governu ne’ebé relevante no uza liu-fuan ne’ebé appropriada
- Temi Ita nia naran rasik, hela fatin/edifisiu, número telefone no email
- Entrega karta ne’e (ka bele hato’o pedidu liuhosi telefone)

Etapa 3: Avalia no analiza dokumentu sira. Iha pergunta importante balu ne’ebé Ita bele husu bainhira avalia dokumentu sira:

- Governu halo promesa prinsipál saida de’it ba povu?
- Identifika indikadór sira hodi haree karik promesa ne’e realiza ona ka lae. Iha indikadór oioin ne’ebé bele uza:
 - **Alokasaun orsamentál** – identifika osan hira mak Governu promete no aloka ona iha orsamentu.
 - **Rekursu sira** – kada servisu iha kontribuisaun ne’ebé Governu no/ka parseiru fó ona, n.e. meza iha eskola ka kadoras ba sistema bee, número pesoál saúde ne’ebé servisu iha postu saúde, tipu infra-estrutura ka ekipamentu sira.

1 Haree Dekretu Lei 43/2016

http://www.mj.gov.tl/jornal/public/docs/2016/serie_1/SERIE_I_NO_40a.pdf. Etapa sira ne’ebé atu hanesan mós hatuur ona iha Integrity Action (2014), ‘A Practical Guide to Community Integrity Building’ (Matadalan Prátika kona-ba Harii Integridade Komunitária), http://integrityaction.org/sites/default/files/publication/files/CIB_GuideENG_2014.pdf - ne’ebé Luta Hamutuk uza daudaun

- **Kontratu no Bill of Quantity (BoQ)** – ida ne'e sei informa Ita kona-ba sa'ida mak tenke presta nu'udar parte husi projetu.
- Governu estabelese **padraun servisu** hodi esplika servisu ne'ebé sei fornese ba povu n.e. oras ba labarik sira iha eskola ka klínika saúde nia oras servisu.
Nota: Komunidade bele determina indikadór seluk iha tempu oin mai liuhosi prosesu partisipativu ne'ebé tuir mai bele uza hodi avalia dezempeñu husi servisu ne'e (haree Instrumentu 3: Grupu Foku ba Pontuasaun).
- Informasaun ne'e klaru no kompletu ka lae? Nota informasaun ne'ebé seidauk kompletu no bele hakerek nota sira alista iha relatório bainhira auditoria sosiál ne'e remata.

Etapa 4: Uza dokumentu sira hodi dezenvolve Ita nia instrumentu halibur dadus hodi hala'o auditoria sosiál (refere ba faze 2 iha Matadalan kona-ba Auditoria Sosiál).

Tipu dokumentu ne'ebé Ita presiza haree	Oinsá bele hetan asesu ba dokumentu sira	Etapa sira ne'ebé tenke foti bainhira la hetan asesu
Lei, dekretu-lei, dekretu governu, rezolusaun, diploma, ne'ebé relevante ba setór	<ul style="list-style-type: none"> • <i>Jornal da Republica</i> iha Ministériu Justisa nia website www.mj.gov.tl/jornal/ • Entrega pedidu ida hodi hetan informasaun ba funzionáriu ne'ebé kompetente • Hasoru malu ho asesór legál sira iha Ministériu ne'ebé relevante 	<ul style="list-style-type: none"> • Lei hotu-hotu ne'ebé ein-vigór (promulga tiha ona husi Presidente RDTL) tenke publika iha <i>Jornal da Republica</i>. • Karik lei ne'e disponivel iha lian-portugés de'it, Ita bele husu versaun iha lian-tetun
Polítika husi Governu ka Ministériu relevante inklui deklarasaun ofisiál, RDTL nia Planu Estratégiku Ba Dezenvolvimentu 2015-2030 no planu dezenvolvimentu sira seluk	<ul style="list-style-type: none"> • Lei jornál sira • Buka informasaun iha Governu nia website • Buka Ministériu sira-nia website • Hatama pedidu ida hodi hetan informasaun ba funzionáriu ne'ebé kompetente • Hasoru malu ho ema ruma iha Ministériu ka departamentu ne'ebé relevante • Hasoru malu ho parseiru dezenvolvimentu internasional sira ne'ebé finansia programa sira iha setór ne'e • Hasoru malu ho OSS no ONGI sira seluk ne'ebé servisu hodi haree ba kestaun ne'e 	<ul style="list-style-type: none"> • Kontakta UAS iha GPM hodi fasilita akompañamentu ba pedidu ofisiál


Tipu dokumentu ne'ebé Ita presiza haree	Oinsá bele hetan asesu ba dokumentu sira	Etapa sira ne'ebé tenke foti bainhira la hetan asesu
Governu nia matadalan ba servisu ida - kontribuisaun no padraun-servisu sira ne'ebé promete ona	<ul style="list-style-type: none"> Buka informasaun iha Ministériu sira-nia website Hatama pedidu ida hodi hetan informasaun ba funzionáriu ne'ebé kompetente Hasoru malu ho ema ruma iha Ministériu ka departamentu ne'ebé relevante 	<ul style="list-style-type: none"> Kontakta UAS iha GPM hodi fasilita akompañamentu ba pedidu ofisiál
Kódigu Éтика ba funzionáriu públiku sira	<ul style="list-style-type: none"> Buka informasaun iha Ministériu sira-nia website Hatama pedidu ida hodi hetan informasaun ba funzionáriu ne'ebé kompetente Hasoru malu ho ema ruma iha Ministériu ka departamentu ne'ebé relevante 	<ul style="list-style-type: none"> Kontakta UAS iha GPM hodi fasilita akompañamentu ba pedidu ofisiál
Orsamentu no proposta orsamentál	<ul style="list-style-type: none"> Buka Orsamentu Jerál Estadu iha Ministériu Finansas nia website: www.mof.gov.tl Kuadru informasaun iha fatin projetu Háree avizu ofisiál ne'e publika iha mídia Portal Transparénsia Orsamentu www.transparency.gov.tl/tetum.html 	<ul style="list-style-type: none"> Hatama pedidu ida hodi hetan informasaun ba funzionáriu ne'ebé kompetente
Kontratu no Lista kuantidade servisu, maun de obra no materiál sira ne'ebé presiza - <i>Bill of Quantity (BoQ)</i>	<ul style="list-style-type: none"> Hasoru malu ho empreza pública Portal Transparénsia Aprovizionamentu www.transparency.gov.tl/tetum.html 	<ul style="list-style-type: none"> Hatama pedidu ida hodi hetan informasaun ba funzionáriu ne'ebé kompetente
Dadus ka peskiza ne'ebé eziste ne'ebé hatudu dezempeňu no/ ka impaktu sira husi programa, servisu ka projetu	<ul style="list-style-type: none"> Buka informasaun iha Sensu no informasaun estatística seluk nian iha Diresaun Estatística nia website: www.statistics.gov.tl Buka informasaun iha Ministériu sira-nia website Hatama pedidu ida hodi hetan informasaun ba funzionáriu ne'ebé kompetente Hasoru malu ho ema ruma iha Ministériu ka departamentu ne'ebé relevante Hasoru malu ho parseiru dezenvolvimentu internasional sira ne'ebé finansia programa sira iha setór ne'e Hasoru malu ho OSS no ONGI sira seluk ne'ebé servisu hodi haree ba kestaun ne'e 	<ul style="list-style-type: none"> Hatama pedidu ida hodi hetan informasaun ba funzionáriu ne'ebé kompetente

PROSESU 2 – Halo mapeamentu ba parte interesada sira & analiza podér

Etapa 1: Determina servisu, programa ka projetu ne'ebé Ita nia auditoria sosiál sei foka ba. n.e. programa merenda eskolár.

Etapa 2: Hakerek mapa iha kuadru ka flip chart. Mapa iha okos karik di'ak atu uja.

- Hakerek servisu, programa ka projetu iha klaran.
- Kada kamada reprezenta nível ida; aldeia, suku, postu administrativu , munisípiu no nasionál.
- Konsidera atór sira iha kada nível bainhira Ita kompleta Etapa 3.



Etapa 3: Identifika atór hotu-hotu ne'ebé relevante iha kada nível no hakerek sira-nara naran iha mapa. Karik posivel, hakerek indivíduu /papél espesífiku ka pozisaun. Sira bele mai husi setór públiku, setór privadu, sosiedade sivil no komunidade no bele mós inklui:

- Atór sira ne'ebé iha informasaun ne'ebé Ita presiza hodi planeia Ita nia auditoria sosiál
- Atór sira ne'ebé tenke ajuda Ita implementa auditoria sosiál
- Atór sira ne'ebé iha responsabilidade hodi implementa servisu, programa ka projetu
- Atór sira ne'ebé bele ajuda hodi hetan mudansa pozitiva ba servisu, programa ka projetu

Ezemplu sira husi tipu parte interesada mak:

Setór Privadu	Setór Públiku	Sosiedade Sivil	Komunidade
<ul style="list-style-type: none"> Negósiu no empreza sira-nia na'in Instituisaun finanseira sira Órgaun profisionál 	<ul style="list-style-type: none"> Ministru, Sekretáriu Estadu, Xefe Departamentu no sira-nia asesór Membru Parlamentu no Komisaun Parlamentár sira Administrasaun lokál - Munisípiu no Xefe Suku / Aldeia Funsionáriu públiku Militár no polísia Órgaun ne'ebé halo supervizaun (n.e. KAK, PDHJ, Tribunál) 	<ul style="list-style-type: none"> ONG & ONGI Jornalista no mídia Lider religiozu Universidade sira 	<ul style="list-style-type: none"> Grupu komunidade lokál Membru komunidade Grupu vulneravel

Se mak bele ajuda Ita identifika atór sira?

- Bele diskute ho Ita nia ekipa, inklui mós ema sira ne'ebé iha koñesimentu kle'an kona-ba setór ne'ebé Ita foka ba, no fatin ne'ebé sei hala'o Ita nia auditoria sosiál
- Ita bele konvida ONG sira seluk ne'ebé servisu iha setór hanesan hodi envolve an iha análise ba parte interesada sira
- Ita karik hakarak halo ida ne'e ho Ekipa Auditoria Sosiál ida ne'ebé bazeia ba komunidade hodi bele identifika individu espesífiku sira iha nível lokál (háree Etapa 2.2)

Etapa 4: Tau atór sira iha grupu espesífiku, no marka ho kór ka símbolu seluk. Hakerek asaun sira ne'ebé bele foti hamutuk ho atór espesífiku idaidak.

Ezemplu grupu atór sira no asaun sira ne'ebé bele foti alista hela iha tabela. Ita bele prepara ita nia tabela rasik hosi nota atór no asaun espesífiku sira.

Etapa 5: Refere ba no atualiza beibeik mapa parte interesada sira ne'e, hodi planeia, implementa no relata Ita nia auditoria sosiál.

Grupu atór sira	Asaun sira ne'ebé bele foti
Sé mak implementa ka hola parte iha servisu, programa ka projetu ne'ebé Ita avalia daudaun liuhosi Ita nia auditoria sosiál?	<ul style="list-style-type: none"> Hasoru malu ho sira hodi hetan dokumentu no hodi informa ba sira kona-ba Ita nia auditoria sosiál (háree Etapa 1.5) Envolve sira iha Sorumutu Interfase (háree Etapa 2.4)
Sé mak sei implementa ka hola parte iha auditoria sosiál ne'e?	<ul style="list-style-type: none"> Konsulta ho sira hodi hetan sira-nia kontribuisaun no ideia molok hahú auditoria sosiál (háree Etapa 1.4 no Etapa 1.5) Envolve sira iha formasaun kona-ba instrumentu auditoria sosiál nian (háree Etapa 2.2) Envolve sira iha kada etapa husi siklu auditoria sosiál
Identifika atór sosiedade sivíl sira seluk ne'ebé servisu iha setór ne'e ka halo peskiza no advokasia relasiona ho servisu, programa ka projetu ka iha fatin ne'ebé hanesan?	<ul style="list-style-type: none"> Konsulta ho sira iha faze inisiál hodi buka sira-nia konsellu ka haree possibilidade atu servisu hamutuk hodi hala'o auditoria sosiál, ka parte espesífika husi auditoria sosiál
Sé mak iha podér ka kontrolu hodi foti asaun sira ne'ebé nesesáriu hodi hadi'ak servisu, programa ka projetu ne'ebé Ita avalia daudaun? (Nota: Ita bele reeve ida-ne'e depois dezenvolve Ita nia rekomendasaun sira)	<ul style="list-style-type: none"> Hasoru malu ho sira iha faze inisiál husi siklu hodi fó-hatene sira kona-ba prosesu auditoria sosiál no dezenvolve relasaun dí'ak ho sira Envolve sira iha Sorumutu Interfase karik sira iha nível lokál Dirije rekomendasaun sira ne'ebé mai husi auditoria sosiál ba atór hirak-ne'e no deklara momoos saida mak Ita hakarak sira halo/muda
Sé mak bele iha influénsia ba atór sira ne'ebé iha podér no kontrolu? N.e. asesór ida ba Ministru ka atór mídia ka UAS.	<ul style="list-style-type: none"> Hasoru malu ho sira iha faze inisiál husi siklu, liuliu bainhira identifika katak susar atu influensia atór sira ne'ebé iha podér no kontrolu Envolve sira iha Sorumutu Interfase karik sira iha nível lokál Servisu ho sira ho nune'e sira bele ajuda Ita dezenvolve rekomendasaun no asaun sira ne'ebé sei aseita husi ema sira ne'ebé iha podér no kontrolu
Identifika atór sira ne'ebé hakarak hetan mudansa ne'ebé Ita identifika tiha ona (Nota: bele halo ida-ne'e hafoin prepara Ita nia planu asaun no planu advokasia)	<ul style="list-style-type: none"> Harii koligasaun ho atór hirak-ne'e ho nune'e bele halo advokasia hamutuk Reeve Ita nia planu advokasia ho kontribuisaun husi atór hirak-ne'e. Ida-ne'e sei promove asaun-konjunta

Grupu atór sira	Asaun sira ne'ebé bele foti
Sé mak bele koko hodi estraga Ita nia prosesu auditoria sosiál? (ho intensaun kria difikuldade ba Ita-Boot)?	<ul style="list-style-type: none"> Identifika risku ne'ebé bele hapara Ita nia auditoria sosiál no tuir mai identifika oinsá bele hamenus risku hirak ne Koko atu servisu ho maneira konstrutiva ho atór hirak-ne'e iha faze inisiál no enkoraja sira atu apoia Ita nia auditoria sosiál
Sé mak sei implementa ka hola parte iha auditoria sosiál ne'e?	<ul style="list-style-type: none"> Konsulta ho sira hodi hetan sira-nia kontribuisaun no ideia molok hahú auditoria sosiál (háree Etapa 1.4 no Etapa 1.5) Envolve sira iha formasun kona-ba instrumentu auditoria sosiál nian (háree Etapa 2.2) Envolve sira iha kada etapa husi siklu auditoria sosiál
Sé mak dala ruma bele koko atu impede ka prevene mudansa ruma nu'udar rezultadu husi Ita nia auditoria sosiál?	<ul style="list-style-type: none"> Analiza: sira iha podér no kontrolu to'o iha ne'ebé? Tanbasá sira impede ka prevene mudansa? Saida mak bele influensia sira hodi muda opiniaun? Identifika karik ida-ne'e hamosu risku boot ba Ita nia esforsu advokasia no oinsá bele hamenus risku (n.e. koalia ba atór seluk ka mídia) Identifika atór sira seluk ne'ebé karik iha influensia atu enkoraja suporta ba Ita nia auditoria sosiál Koko atu servisu ho maneira konstrutiva ho atór hirak-ne'e iha faze inisiál no enkoraja sira atu apoia Ita nia auditoria sosiál

PROSESU 3 – Hili instrumentu hodi halibur dadus

Etapa 1: Iha OSS nia laran, diskute pergunta sira tuir mai hodi ajuda Ita avalia Ita nia kompeténsia no rekursu sira:

- Ita nia ekipa iha kompeténsia prinsipál saida de'it – n.e. mobiliza komunidade, peskiza, advokasia, hakerek rekomendasau, envolvimentu político?
- Favór identifika instrumentu auditoria sosiál ne'ebé Ita uza ho susesu iha tempu pasadu, no/ka Ita hakarak uza dala ida tan?
- Ita iha orsamentu hira ba auditoria sosiál?

Etapa 2: Iha OSS nia laran, uza pergunta sira tuir mai hodi ajuda Ita analiza kontestu político:

- Auditoria sosiál ne'e sensitivu ein-termus polítikus ho konsiderasaun ba setór, programa ka projeto ne'ebé Ita hili ona?
- Komunidade ne'e bele hetan risku kuandu partisipa iha atividade pública durante auditoria sosiál?
- Karik sensitivu demais hodi lori hamutuk komunidade ho Governu no kontratante sira hodi diskute auditoria sosiál?

Etapa 3: Iha OSS nia laran, diskute pergunta sira tuir mai kona-ba partisipasaun komunitária iha auditoria sosiál no instrumentu halibur dadus sira:

- Favór identifika instrumentu (sira) ne'ebé sei permite Ita hala'o prosesu positivu no envolve membru hotu-hotu iha komunidade, liuliu grupu vulneravel sira?
- Favór identifika instrumentu (sira) ne'ebé bele adapta ba kontestu lokál no appropriadu liu ba komunidade sira hodi uza, bazeia ba kapasidade?

Etapa 4: Uza resposta sira ne'ebé Ita hakerek ba Etapa 1-3 no konsidera parte ida-idak husi tabela iha okos hodi ajuda Ita hili instrumentu (sira) ne'ebé di'ak liu hotu.

- Favór identifika instrumentu (sira) ne'ebé fasil liu hotu hodi implementa no repete bazeia ba Ita nia kompeténsia no rekursu sira? Nota: efikás liu hodi uza instrumentu oioin duké uza instrumentu ida de'it
- Favór identifika instrumentu sira ne'ebé proteje didi'ak komunidade karik auditoria sosiál parese sensivel ein-termus polítikus?
- Favór identifika instrumentu sira ne'ebé sei útil liu atu produs informasaun ne'ebé bele influénsia melloramentu ba servisu, programa ka projeto governu?

Etapa 5: Karik Ita hili instrumentu ida ne'ebé sei efikás liu hotu, maibé ekipa auditoria sosiál laiha kompeténsia nesesária hodi implementa? Ita bele koko buat hirak tuir mai:

- Uza instrusaun ne'ebé inklui iha matadalan ne'e no referénsia ba materiál sira seluk hodi haree karik iha informasaun suficiente hodi uza instrumentu ne'e ho konfiansa
- Ko'alia ho OSS seluk ne'ebé uza ona instrumentu ne'e, no bele kria parseria hodi servisu hamutuk, ka husu sira-nia konsellu no formasaun hodi uza instrumentu ne'e
- Hasoru malu ho ReNAS hodi husu karik sira bele organiza sesaun formasaun ba OSS sira kona-ba instrumentu ida-ne'e.

Instrumentu no deskrisaun bada	Dadus ne'ebé sei hetan husi instrumentu ne'e	Espetativa ba resultadu	Kompetensia ne'ebé nesésáriu	Dezaifiu Potensiáli
Buka Tuir Orsamentu Uza hodi haree karik orsamentu ne'ebé Governu aloka ona to'o duni tarjetu no benefisiáriu ne'ebé refere ba	Dadus kuantitativa - barak liu númeru orsamentu no finanseiru ne'ebé deskreve lalaok osan liuhosi parte oioin governu nian	Transparansia Akontabilidade Governasaun Di'ak	Presiza abiliidade hodi lee no kompara orsamentu sira no despeza - kapasidade boot	Orsamentu sira asesivel maibe despeza sira no lalaok osan ne'e difisil atu buka tuir liuhosi nível oioin governu nian
Buka Tuir Rekursu Uza hodi haree se karik Governu nia promesa sira eziste duni iha komunidade	Kuantitativa - lista espetativa ida ba rekursu sira ne'ebé promete ona no indikadór sira ba servisu, programa ka projetu espesíku kompara ho sa'ida mak prezente duni iha fatin lokál	Transparansia Akontabilidade Governasaun Di'ak	Presiza kompeténsia hodi identifika indikadór sira husi dokumentu sira Governu nian ne'ebé karik envolve envovimentu no negosasaun kona-ba indikadór sira ho governu - kapasidade natoon	Bele difisil hodi bulka indikadór sira iha documento sira Governu nian ka konkorda kona-ba kontribuisaun ho Governu nia parte interesada sira.
Grupu Foku ba Pontuasaun Atu diskute komunidade nia esperiénsia kona- ba servisu, programa ka projetu iha grupu diskusaun nia laran hanesan mós auto- avalisaun ba servisu husi fornecedór governu ka kontraktór sira	Dadus kualitativa husi participante GDF sira kona-ba sira nia opiniaun kona-ba servisu, programa ka projetu ida.	Sidadania Diálogu Hakbi'it Governasaun Di'ak	Presiza abiliidade hodi facilita diskusaun iha grupu ki'lk/ grupu foku - kapasidade natoon	Presiza tempu hodi organiza partisipante sira, data no fatin ba grupu folku. Presija hili partisipante sira ne'ebé iha esperiénsia kona-ba servisu ne'e.

Instrumentu no deskrisaun badaak	Dadus ne'ebé sei hetan husi instrumentu ne'e	Espetativa ba rezultadu	Kompetensia ne'ebé nesesáriu	Dezafiu Potensiáll
Levantamentu auditoria sosíál Atu halo levantamentu kona-ba komunitade nia esperiénsia relasiona ho servisu, programa ka projetu	Informasaun kuantitativa husi resposta partisipante sira ba pergunta sira levantamentu nian. Informasaun kualitativa balun se karik levantamentu inklui pergunta sira ne'ebé nakloke.	Sidadania Transparansi Akontabilidade	Presiza abilidade hodi husu pergunta ba indivídu sira ho uza levantamentu - kapasidade natoon Dala ruma bele uja 'tablet' elektronika - kapasidade natoon Presiza analiza ba dadus barak liu - kapasidade boot	Memburu komunidade dala ruma la sente confortu hodi fahe sira-nia esperiénsia lolos iha levantamentu Iha lakuna tempu entre halibur dadus no analiza no fahe rezultadu sira ba fali parseru sira, ne'ebé karik halo influensia ba mudansa liuhosi auditoria sosíál bele sai demora
Sorumutu Interface Atu fahe opiniaun husi parseiru oioin; fahe komprensaun hamutuk kona-ba situasaun; harii relasaun no enkoraja asaun hamutuk hodi fó atensaun ba kestaun sira	Informasaun kualitativa husi diálogu entre parseiru oioin. Planu asaun aseitavel ida atu responde ba problema sira no papel no responsabilidade no orariu atu foti assaun.	Akontabilidade Sidadania Diálogu Hakbít Governausun Di'ak Haforsa Responsabilidade	Rona opiniaun husi parseiru oioin bele hamosu konfrontasaun ideia sira. Iha nesesiadade hodi facilita no kria konfiansa bá malu. Labele uza instrumentu ne'e kuandu kestaun ne'e sensitivu tebes ein- termus polítikus	

PROSESU 4 – Organiza no forma ekipa auditoria sosiál no Pontu Fokál sira

Etapa 1: Hala’o sorumutu inisiál ho komunidade hodi hahú auditoria sosiál

- Bazeia ba komunidade nia envolvimentu durante Faze 1, Ita prontu hodi hala’o sorumutu inisiál ho membru komunidade no lider komunitáriu. Sorumutu ne’e iha objetivu balu:
 - Hodi esplika konseitu no benefísiu sira husi auditoria sosiál.
 - Fó espasu ba komunidade hodi esplika oinsá sira partisipa ona iha projeto no programa sira no diskute oinsá sira hakarak partisipa iha auditoria sosiál no saida mak sira hakarak hetan husi prosesu ne’e.
 - Hodi hahú prosesu edukasaun ba sidadaun sira (haree Faze 1.4)
- Sorumutu ne’e tenke envolve grupu luan no reprezentativu husi membru komunidade sira – inklui ema husi grupu vulneravel sira.
- Servisu ho ema sira ne’ebé Ita koñese ona iha komunidade (ka estabelese kontaktu ho ema foun) hodi organiza fatin, loron no tempu ne’ebé appropriadu hodi hala’o sorumutu ne’e, hodi identifika partisipante sira no hato’o konvite bazeia ba Ita nia kritériu kona-ba partisipante sira.

Etapa 2: Hili pontu fokál sira no ekipa auditoria sosiál

- Iha sorumutu inisiál ho komunidade importante atu hili voluntáriu sira ne’ebé sei servisu ho Ita hodi hala’o auditoria sosiál. Ekipa ne’e sei inklui komisaun ida reprezentatnte komunidade nian no pontu fokál voluntariu na’in ida ka rua. Organizaun ruma uza naran Grupu Monitorizasaun Bazeia ba Komunidade (GMBK) maibé Ita bele uza naran seluk ne’ebé appropriadu.
- Uza kritériu hodi orienta grupu ne’e liuhosi prosesu hodi hili komisaun. Asegura katak hili mane no fetu hotu, ema ho idade boot no mós foin-sa’e, no reprezenta grupu vulneravel sira (haree 2.2 husi Matadalan).
- Pontu fokál sira atua hanesan lider ba komisaun, no iha dever oioin husi komisaun sira seluk. Kritériu atu hili pontu fokál sira bele inklui²:
 - Onestu
 - Hatene lee no hakerek
 - Hela iha komunidade iha ne’ebé mak atu halo auditoria sosiál
 - Figura komunidade ne’ebé ema seluk fiar
 - La’ós funsionáriu husi administrasaun
 - Apoia monitorizasaun komunitária
 - Iha tempu livre durante períodu siklu auditoria sosiál
 - Iha vontade atu sai voluntáriu

2 Ida-ne’e adapta ona husi Integrity Action (2014), ‘A Practical Guide to Community Integrity Building’ (Matadalan Prátika kona-ba Harii Integridade iha Komunidade), http://integrityaction.org/sites/default/files/publication/files/CIB_GuideENG_2014.pdf - ne’ebé Luta Hamutuk uza daudaun

- Iha kazu balu, bele iha grupu ne'ebé eziste ona iha komunidade ne'ebé bele sai membru iha ekipa auditoria sosiál. Nu'udar exemplu, grupu inan-aman sira ka komisaun jestau saúde. Garante katak Ita konsulta ho membru komunidade kona-ba ida-ne'e ho nune'e la harii komisaun foun bainhira la nesesáriu.

Etapa 3: Uza seksaun sira husi Matadalan Auditoria Sosiál hodi planeia formasaun

- Ita nia formasaun tenke interativu, fó motivasaun no tenke korresponde ho ekipa auditoria sosiál nia kapasidade iha nível komunitáriu. Ho nune'e, Ita tenke adapta seksaun sira ne'ebé relevante husi manuál ne'e.
- Seksau importante balu hodi adapta inklui:
 - Definisaun kona-ba auditoria sosiál
 - Kontestu auditoria sosiál iha Timor-Leste (fó deskrisaun badak kona-ba atór no lei prinsipál sira)
 - Siklu auditoria sosiál no esplika etapa prinsipál sira
 - Instrumentu sira ne'ebé Ita hili ona
 - Oinsá atu dezenvolve planu advokasia
- Prepara konteúdo importante sira seluk, bazeia ba Faze 1 husi auditoria sosiál ne'ebé OSS implementa ona. Ida-ne'e tenke inklui:
 - Rezultadu sira husi Ita nia revizaun ba dokumentu sira. Simples de'it, nu'udar exemplu, deskreve saida mak governu promete atu hala'o no indikadór sira hodi haree karik promesa ne'e realiza ka lae
 - Rezultadu sira husi mapeamentu ba parte interesada sira & análise podér

Etapa 4: Implementa formasaun ho maneira interativa

- Formasaun tenke fó oportunidade barak ba partisipante sira hodi diskute, husi pergunta no hato'o sira-nia ideia rasik.
- Dezenvolve agenda ida ba formasaun no tuir mai identifika fatin, loron no tempu ne'ebé korresponde ho partisipante sira-nia nesesidade. Dala ruma tenke hala'o formasaun ne'e durante loron balu.
- Iha formatu oioin hodi hala'o formasaun, maibé importante atu apresenta konteúdo balu, no tuir mai loke sesaun no uza atividade sira hodi permite partisipante sira komprende saida mak apresenta ona no hato'o sira-nia ideia rasik.
- Se seidauk hala'o formasaun barak iha nível komunitáriu, husu ONG sira seluk kona-ba ideia di'ak atu hala'o atividade formasaun ne'ebé sei enkoraja partisipante sira atu aprende no iha interasaun ba malu.

Etapa 5: Pratika instrumentu sira ho partisipante sira iha formasaun ne'e

- Identifika oportunidade ba voluntáriu sira auditoria sosiál nian hodi 'koko' instrumentu sira. Opsau sira inklui:
 - Garante katak iha oportunidade iha formasaun ba partisipante sira atu pratika instrumentu sira ba malu. Fó komentáriu kona-ba sira-nia práтика (garante atu enkorajala'ós kritika sira!)
 - Karik posivel, husu ema seluk iha komunidade karik sira konkorda atu hola parte iha 'teste' ho nune'e voluntáriu sira auditoria sosiál nian bele pratika sira-nia kompeténsia foun n.e. uza karta-avaliasaun komunidade.
 - Bainhira Ita prontu atu implementa instrumentu sira, servisu hamutuk ho voluntáriu sira no hatudu oinsá halo ida-ne'e. Karik sira prontu ona, konvida sira atu halo rasik no Ita superviziona no enkoraja de'it. Karik sira seidauk prontu, garante katak sira haree didi'ak saida mak Ita halo. Ho nune'e, sira bele prontu bainhira Ita hala'o auditoria sosiál tuir mai.

Etapa 6: Depois auditoria sosiál ne'e implementa ona, hala'o sesaun reflesaun ho partisipante sira husi formasaun ne'e:

- Hodi identifika susesu no dezafiu ne'ebé sira hasoru.
- Hodi fó motivasaun no enkoraja sira ho ajuda sira identifika saida mak sira halo ho didi'ak.
- Deside área sira ne'ebé presiza formasaun adisionál.

PROSESU 5 – Hakerek relatóriu finál kona-ba auditoria sosiál

Bele utiliza modelu tuir mai bainhira prepara relatóriu finál:

Título:

Fó título ida ne'ebé klarifika foku, fatin no tempu ne'ebé hala'o auditoria sosiál ne'e.

N.e. Auditoria Sosiál ba Saneamentu Báziku iha Munisípiu Ainaru, Juñu 2017.

Kontestu:

- Auditoria sosiál ne'e foka ba setór ida ne'ebé?
- Auditoria sosiál ne'e avalia programa, projeto ka servisu ida ne'ebé?
- Fatin iha ne'ebé?

Prosesu:

- Etapa saida de'it mak halo ona hodi hala'o auditoria sosiál?
- Instrumentu espesífika saida de'it mak uza hodi halibur dadus?
- Sé mak envolvidu hodi hala'o auditoria sosiál, inklui ekipa auditoria sosiál; pontu fokál sira iha komunidade no komisaun komunidade/ grupu monitorizasaun?
- Ita hasoru malu, konsulta no halibur dadus husi sé-sé de'it? (Nota: labele uza sira-nia naran, temi de'it número ema husi kada grupu n.e. Ministériu Saúde, administrasaun lokál, pesoál sira husi Klínika Saúde, feto sira-nia grupu iha komunidade nst...)
- Ita hasoru dezafiu prinsipál saida de'it durante prosesu ne'e?
- Nota: labele relata rezultadu sira iha seksaun ne'e

Rezultadu sira:

- Rezultadu sira husi análise ba dokumentu sira: Deskreve Governu nia promesa no indikadór sira ne'ebé Ita avalia tiha ona. Halo lista dokumentu sira ne'ebé Ita hetan tiha ona no mós halista dokumentu ka informasaun ne'ebé Ita la bele hetan.
- Rezultadu kona-ba instrumentu sira ne'ebé uza hodi halibur dadus; n.e. Tabela Akompaña Orsamentu, Kartaun-Avaliasaun Komunidade ka Levantamentu Auditoria Sosiál. Ita bele inklui tabela, gráfiku ka fotu, karik iha.
- Deklarasaun globál kona-ba konkluzaun husi auditoria sosiál ('rezultadu prinsipál sira'), kompara ho Governu nia promesa
- Dadus ne'ebé seidauk hetan – rezultadu sira ne'ebé la kompletu tanba razaun ruma?

Rekomendasaun sira:

- Fó deklarasaun kona-ba projeto, programa ka servisu nia kualidade no bazeia ba ida-ne'e, fó rekomendasaun jerál ba política.
- Halo lista ba rekomendasaun espesífika sira no rekomendasaun ne'e foka ba sé. Bele kategoriza rekomendasaun sira, depende atu foka ba sé. Tau número ba kada rekomendasaun ho nune'e ema seluk bele haree nia número referénsia.

Aneksu sira:

Tenke inklui aneksu sira tuir mai

- planu asaun iha nível lokál
- instrumentu sira hodi halibur dadus

PROSESU 6 – Planu Advokasia ba Asaun no Rekomendasaun sira

Etapa 1: Halibur materiál husi auditoria sosiál ne’ebé sei presiza hodi kria planu advokasia ne’ebé inklui:

- análise ba parte interesada sira (ida-ne’e oportunidade di’ak hodi aumenta/ hadia mapeamentu ba parte interesada sira)
- planu asaun dezenvolve iha sorumutu interfase
- konklusaun no rekomendasaun sira husi relatório finál

Uza flip chart ka kuadru hodi prepara lista asaun ka rekomendasaun sira, bazeia ba dokumentu hirak-ne’e, ne’ebé depende ba Governu no funzionáriu públiku atu implementa (tanba sidadaun baibain laiha podér ka autoridade hodi implementa asaun ka rekomendasaun sira ne’e)

Etapa 2: Garante katak asaun no rekomendasaun sira klaru, espesífiku no bele sukat. Selae, tenke modifika ka hasai sira (lembra, ita labele realiza buat hotu!).³

- **Espesífiku:** favór identifika asaun espesífika ne’ebé hakarak Governu atu foti? Tenke klarifikasi saida mak Ita hakarak Governu atu halo, oinsá atu halo, iha ne’ebé no bainhira. Tenke klarifikasi sé-sé de’it iha Governu tenke halo ida-ne’e (n.e. departamentu ka ema ho autoridade ne’ebé iha podér no autoridade hodi halo ida-ne’e?)
- **Realista:** asaun ne’e tenke konstitui buat rumo ne’ebé posivel atu halo. Bele komplikadu, maibé la bele imposivel. Konsidera didi’ak saida mak Governu tenke halo hodi realiza asaun ne’e, ka implementa rekomendasaun ne’e, no karik relasiona ho mudansa ba tempu naruk, rekomenda asaun ki’ik lubuk ida ne’ebé nesesáriu hodi realiza mudansa ne’e.
- **Bele sukat:** Ita tenke iha kapasidade hodi avalia karik asaun ne’e foti ona, ka rekomendasaun ne’e implementa ona. Oinsá Ita sei sukat situasaun ne’ebé di’ak liu? N.e. hasa’e número eskola ho X, ka X% husi populasaun iha asesu ba saneamentu.

Etapa 3: Depois modifika ona asaun no rekomendasaun sira, ita prontu ona hodi prepara planu. Uza tabela tuir mai hodi planeia esforsu advokasia:

- **Asaun ka rekomendasaun:** husi lista ne’ebé kria iha Estapa 2
- **Alvu:** sé mak iha podér ka autoridade hodi implementa asaun ka rekomendasaun – sé-sé mak hola desizaun? Ida-ne’e nia alvu husi Ita nia esforsu advokasia. Mapeamentu ba parte interesada sira mós identifika atór sira ne’ebé bele influensia ema sira ne’ebé hola desizaun. Ezemplu balu inklui UAS iha GPM, Pontu Fokál sira Auditoria Sosiál nian iha kada ministériu, ka indivíduu sira seluk iha ministériu sira ne’ebé relevante ka Autoridade Munisipál. ‘Ema hirak ne’ebé iha influénsia’ tenke inklui mós iha tabela.
- **Tipu Komunikasaun:** tenke hato’o informasaun no rekomendasaun sira ba alvu

³ Ida-ne’e adapta ona husi ‘Integrity Action (2014), ‘A Practical Guide to Community Integrity Building’ (Matadalan Prátika kona-ba Harii Integridade iha Komunidade), http://integrityaction.org/sites/default/files/publication/files/CIB_GuideENG_2014.pdf - ne’ebé Luta Hamutuk uza daudaun

ho formatu saida de'it? Ita nia lia-menon prinsipál sei uza formatu saida de'it? N.e. Ministru ida ne'ebé okupadu tebes sei la lee relatóriu naruk.

- **Oinsá bele hato'o informasaun ba sira?** Ita bele halo atividade saida de'it hodi komunika Ita nia lia-menon ba alvu? Ezemplu balu inklui workshop, sorumutu meza-kabuar, komunikadu imprensa, telefone, surat, loran ida hodi halo asaun, espetáculo teatru, nsst ...tenke kriativu no garante katak Ita envolve mídia bainhira posivel!
- **Sé mak sei halo ida-ne'e?** Ita bele servisu ho sé-sé de'it hodi hasa'e susesu husi Ita nia advokasia? Ita envolve ReNAS ka lae? Bele tama ka harii koligasaun ida? Ka servisu ho parseiru sira? Ita sei envolve membru komunidade sira ne'ebé ajuda Ita hala'o auditoria sosiál? Sé-sé de'it mak efikás liu hodi 'hato'o' Ita nia lia-menon?
- **Kalendáriu:** bainhira Ita sei halo ida-ne'e? Karik iha tempu espesífiku ne'ebé efikás liu tanba eventu político ka eventu seluk ne'ebé akontese daudaun? N.e. bele hato'o ba Ministériu molok sira halo planeamentu orsamentál iha Abril.

Asaun ka rekomendasau	Alvu / tarjetu	Tipu Komunikasaun	Oinsá bele hato'o informasaun ba sira?	Sé mak sei halo ida-ne'e?	Prazu

Etapa 4: Prepara komunikasaun oioin. Kada tipu komunikasaun tenke inklui:⁴

- Deklarasaun klara kona-ba solusaun no asaun
- Evidénsia! Garante katak faktu no número sira ladún komplikadu no apresenta ho maneira kriativa
- Foka komunikasaun ne'e ba ema ne'ebé hola desizaun, maibé mós ba ema sira ne'ebé bele influensia ema ne'ebé hola desizaun
- Simples no badak de'it
- Uza istória no ema nia lian rasik sei bele

Etapa 5: Komunika rezultadu sira ba públiku. Iha dalan oioin ne'ebé Ita bele uza hodi komunika konkluzaun sira iha nível lokál:

- Tau iha fatin públiku iha komunidade laran - ho nune'e ema hotu-hotu bele haree ho klaru. Atualiza beibeik informasaun ne'e bainhira iha progresu kona-ba asaun sira ne'ebé rekomenda ona ho nune'e komunidade sira sempre iha informasaun atualizada no ema hotu-hotu bele haree mudansa ne'ebé akontese daudaun
- Fahe konkluzaun sira liuhosi rádiu públiku

4 Ida-ne'e adapta ona husi 'Integrity Action (2014), 'A Practical Guide to Community Integrity Building' (Matadalan Prátika kona-ba Harii Integridade iha Komunidade), http://integrityaction.org/sites/default/files/publication/files/CIB_GuideENG_2014.pdf - ne'ebé Luta Hamutuk uza daudaun

- Sorumutu sira – tuir enkontru regulár ne’ebé hala’o ona iha komunidade hodi fahe rezultadu sira husi prosesu auditoria sosiál
- Servisu ho lider Igreja hodi fahe informasaun iha Misa no eventu seluk Igreja nian.

Etapa 6: Revee planu advokasia no relata progresu.

- Organiza revizaun regulár ho ekipa advokasia hodi verifika progresu ba esforsu advokasia. Ida-ne’e sei ajuda atu subliña no selebra susesu sira, ho nune’e sempre iha motivasaun! Sei ajuda Ita identifikasi tanbasá esforsu advokasia balu la hetan rezultadu, ka fatin partikulár la hetan rezultadu.
- Kona-ba esforsu sira ne’ebé la hetan susesu, konsidera asaun no dalan seluk.
- Relata progresu kona-ba Ita nia advokasia ba komunidade no mós ba Ita nia koligasaun, parseiru no parte interesada sira seluk ne’ebé importante, ne’ebé servisu ho Ita durante ne’e.

INSTRUMENTU 1 – Buka Tuir Orsamentu

Buka Tuir Orsamentu nu'udar prosesu ida hodi akompaña oinsá osan muda husi nível ida-idak iha Governu nia laran, hodi to'o servisu sira ne'ebé presta ba komunidade (hanesan eskola, servisu saúde ka obra pública). Atividade ida ne'e ajuda ita hatene proporsaun husi osan ne'ebé aloka iha faze inisiál to'o ona iha kada nível no han tempu hira.

Buka Tuir Orsamentu, mós hanaran Levantamento kona-ba Buka Tuir Despeza Pública (*Public Expenditure Tracking Survey*, PETS), komplikadu uitoan hodi implementa no instrumentu ne'e fó rezume badak de'it kona-ba etapa sira ne'ebé nesesáriu ba atividade buka tuir orsamentu. Haree 'Rekursu sira seluk kona-ba PETS' iha okos hodi hetan detalle no orientasaun adisionál.

Estabelese no fó treinamentu ba ekipa ida hodi implementa atividade Buka Tuir Orsamentu. Ida ne'e bele involve membru komunidade sira, maibe mós bele halo husi OSS ida láho involvimentu direta komunidade nian.

Etapa 1: Determina loloos sa'ida mak sai Ita nia foku husi atividade buka tuir orsamentu ne'e

Ita-Boot nia prosesu Buka Tuir Orsamentu tenke fokalizadu. PETS ne'ebé hetan susesu boot liu mak sira ne'ebé foka ba projeto, programa ka política espesífiku.

- Garante katak prosesu akompaña orsamentu ne'ebé propoin daudaun tenke viavel ba Ita-Boot nia organizasaun
- Garante katak audiénsia-alvu interesadu ba prosesu akompaña orsamentu

La presiza foka ba sistema Governu tomak, di'ak liu maka foka ba programa ka política espesífiku. Konkluzaun no rekomendasau sira sei forte liu bainhira ita foka ba buat ida ne'ebé ki'ik liu.

Hili Tópiku ba iha atividade Buka Tuir Orsamentu – Ezemplu sira ba pergunta

Nivel instituisaun? Eskola primária ka eskola sekundária

Tipu instituisaun (sira)? Públiku, Privadu, ONG mak lidera

Kategoria despeza ka lalaok rekursu? Saláriu, Despeza Kapitál

Programa ka política saida? Programa bolsa-estudu, Fundu ba livru eskolár, despeza ba Vasina ka transferénsia ein-espésie

Ámbitu jeográfiku? Foka ba NASAUN tomak, distritu (sira) ne'ebé espesífiku, sub-distritu (sira) ne'ebé espesífiku

Fonte: Koziol no Tolmie (2010)

Defini pergunta-xave sira ne'ebé hakarak hatán liuhosi levantamentu ne'e. Se prepara pergunta importante balu de'it ne'ebé espesífiku, sei ajuda prosesu buka tuir orsamentu atu sai viavel no garante katak rekomendasaun sira sei espesífiku no sei hamosu asaun klara.

Etapa 2: Konsulta ho reprezentante sira husi Governu no konkorda hodi hala'o levantamentu

Atu garante katak levantamentu ne'e hamosu impaktu pozitivu, sei diak tebes wainhira hetan kompromisu no apoiu husi reprezentante sira ne'ebé importante husi Governu. Dala ruma ida-ne'e la posivel. Se Ita-Boot konsulta ho funzionáriu públiku bele ajuda hodi klarifikasi ámbitu levantamentu, identifika kestaun ruma ne'ebé Ita-Boot bele hatán liuhosi levantamentu, no konkorda kona-ba audiénsia importante sira ne'ebé simu relatóriu ne'e.

Etapa 3: Mapeamentu ba Lalaok osan

Depois hili ona foku husi levantamentu, bele buka tuir oinsá osan muda husi nível ida-idak iha Governu nia laran. Bele difisil tanba movimentu sira komplikadu no dala ruma ita sei la bele hetan informasaun hotu-hotu ne'ebé nesesáriu. Mapa la presiza inklui sistema Governu tomak, só parte sira husi sistema ne'ebé relevante ba levantamentu.

Kria mapa ida ne'ebé klaru ne'e esensiál ba atividade buka tuir orsamentu. Tuir mai ne'e exemplu kona-ba lalaok buka tuir orsamentu ba setór Edukasaun. Foku mak biblioteka iha eskola primária sira iha Munisípiu Manufahi:



Bele haree exemplu sira kona-ba lalaok osan iha:

<https://openknowledge.worldbank.org/handle/10986/2502>

Etapa 4: Halibur no analiza dadus

Mapa kona-ba dalan rekursu hatudu fonte sira iha orsamentu ne'ebé ita tenke verifika no kompara.

Wainhira hala'oatividade buka tuir orsamentu, tenke halibur rejistru sira husi fatin ne'ebé diferente. Ita tenke kompara rejistru sira ne'ebé hatudu osan hira ne'ebé kompromete ona, ho rejistru sira ne'ebé hatudu osan hira mak simu no gasta ona iha kada etapa husi mapa ne'e. Determina karik rejistru sira korresponde ba malu. Ida-ne'e bele hatudu fatin sira iha-ne'ebé osan orsamentu sei lakon ka estraga ka karik iha problema ruma iha sasulik osan liuhosi parte oioin governu nian.

Dala ruma bele susar hodi hetan asesu ba informasaun kona-ba orsamentu. Se Ita-Boot hetan ona kompromisu no aprovasaun husi membru balu iha Governu ka administrasaun bele garante katak informasaun kona-ba orsamentu disponivel ba ita.

Baibain, tenke halibur dadus sekundáriu no primáriu, ne'ebé inklui:

- Dadus kona-ba orsamentu iha nível nasional (Orsamentu Jerál Estadu no Ministériu nia orsamentu sira)
- Planu servisu annuál sira no orsamentu sira ba departamentu relevante
- Dadus kona-ba orsamentu iha nível Munisípiu ka Suku
- Dadus kona-ba orsamentu ba instituisaun ka unidade sira, n.e. biblioteka iha eskola
- Dadus kona-ba osan ne'ebé gasta ona hodi fornese servisu sira iha terrenu n.e. funzionamentu biblioteka no nia pesoál sira.

Relaciona ho dadus kona-ba orsamentu ba instituisaun ka unidade sira, no kona-ba osan ne'ebé gasta ona hodi fornese servisu sira iha terrenu, ita tenke identifika amostra hodi halibur informasaun. Ida-ne'e signifika katak tenke hili instituisaun ka unidade no servisu balu iha fatin espesífiku ne'ebé ita sei ezamina. Amostra ne'e labele ki'ik demais, hodi garante kredibilidade husi ita nia dadus no ajuda ita komprende situasaun komún, maibé labele boot demais, hodi korresponde ho Ita-Boot nia tempu no rekursu.

Ita-Boot tenke prepara kestionáriu ida ba ekipa hodi identifika dadus ne'ebé tenke halibur no rejista informasaun husi dadus iha parte ida-idak husi mapa sasulik rekursu nian. Se ita labele hetan dadus balu ne'ebé nesesáriu, bele rejista ida-ne'e iha levantamentu, tanba importante atu relata informasaun ne'e.

Lembra atu fó treinamentu ba ekipa Buka Tuir Orsamentu nian kona-ba oinsá tenke uza kestionáriu levantamentu nian no hatama dadus.

Etapa 5: Halo relatório

Durante halo análise, ita kompara osan ne'ebé promete no gasta iha nível aas liu (n.e. nível Ministériu) ho montante ne'ebé simu iha nível ki'ik liu husi sistema ne'e. Agora ita prontu ona hodi prepara relatório.

Relatório tenke identifika buat ruma iha sistema ne'ebé la eficiente, porezemplu fundus to'o tarde, ka despeza ne'ebé tarde no; diferença entre montante osan ne'ebé kompromete no montante osan ne'ebé simu ona.

Relatório tenke identifika momoos kestaun importante sira no oferese rekomendasaun sira hodi hadi'ak.

Karik Ita-Boot uza instrumentu balu hodi hala'o Ita-Boot nia auditoria sosiál, bele tau hamutuk rezultadu husi instrumentu Buka Tuir Orsamentu no rezultadu husi instrumentu sira seluk.

Etapa 6: Diseminasaun no advokasia

Importante atu fahe relatório ho parte interesada sira ne'ebé importante ho lailais kedas depois kompleta ona levantamentu- ho nune'e konkluzaun no rekomendasaun sira bele relevante no bele hetan atensaun ho lailais.

Husi hahu tenke konsidera sé mak atu simu relatório ne'e, no dalan di'ak liu hotu hodi komunika resultadu no rekomendasau sira. Ita-Boot tenke dezenvolve planu komunikasaun ne'ebé inklui parte interesada oioin (haree mapeamentu ba parte interesada sira ne'ebé halo ona iha faze 1) no dalan di'ak liu hotu hodi komunika.

Se hala'o Sorumutu Interfase ho parte interesada sira ne'ebé envolvidu iha projeto, programa ka servisu ida molok publika relatório ne'e ba públiku, bele ajuda hodi konfirma informasaun no konsidera atu rezolve kedes problema ka kestaun ruma.

Bele konsidera atu organiza semináriu ka workshop ida hodi fahe konkluzaun sira, envolve OSS sira seluk, konvida mídia ka reprezentante sira husi komunidade hodi enkoraja kompromisu no asaun konjunta hodi fó atensaun ba kestaun ruma.

Dala ruma ita mós presiza estratégia advokasia ba tempu naruk hodi garante reforma ba política. Garante katak advokasia bazeia ba evidénsia no informadu husi prosesu akompaña orsamentu. Estratégia sira ne'ebé di'ak hodi halo promosaun ba reforma inklui servisu iha koligasaun no rede sira ho OSS sira seluk, ka hamutuk ho aliadu sira iha Governu nia laran.

Instrumentu ne'e utiliza informasaun husi rekursu sira iha okos, no bele hetan informasaun adisionál iha:

<https://openknowledge.worldbank.org/handle/10986/2502>

https://www.unicef.org/vietnam/PET_MANUAL_TA.pdf

INSTRUMENTU 2 – Buka Tuir Rekursu

Buka Tuir Rekursu ne'e nu'udar prosesu ida hodi kompara kontribuisaun ne'ebé expektável ba servisu, programa ka projetu ida ne'ebé Governu defini tiha ona, ho situasaun atuál.

Saida mak rekursu?

Rekursu sira bele sura no fasil atu haree sira-nia prezensa.

Nu'udar exemplu, Ministériu Saúde compromete rekursu sira ba kada tipu instituisaun ka unidade saúde iha nia Programa Nasional ba Kuidadu Saúde Primário. Buat hirak-ne'e inklui: rekursu umanu (númeru no tipu pesoál saúde); instrumentu; ekipamentu; medikamentu ka aimoruk sira; no mós tipu infraestrutura hanesan seguransa, ahi-oan di'ak, ventilasaun, bee ne'ebé moos ho asesu di'ak, saneamento báziku, eletrisidade, sistema komunikasaun no klínika movele.

Importante atu suporta pontu fokál komunidade no komisaun sira atu lidera instrumentu ida ne'e, ka involve sira maka'as bainhira posivel.

Etapa 1: Konfirma rekursu sira ne'ebé relevante

Kontribuisaun sira diferente no espesíku ba kada tipu servisu/instituisaun ka unidade, programa ka projetu. Garante katak ita identifika ona kontribuisaun sira ne'ebé relevante ba foku husi ita nia auditoria sosiál.

Bele difisil hodi buka kontribuisaun sira ne'ebé Governu defini tiha ona. Konfirma ho reprezentante sira husi Governu no parte interesada sira ne'ebé importante katak ita uza lista atualizada kona-ba kontribuisaun sira. Konfirma lista ne'e ho parte interesada sira ne'ebé importante iha fatin ne'ebé ita hala'o auditoria sosiál.

Etapa 2: Organiza diskusaun grupu foku no konvida partisipante sira

Partisipante sira tenke kompostu husi reprezentante sira husi grupu parte interesada ne'ebé importante no relevante ba foku husi auditoria sosiál.

Prosesu hodi halo mapamentu ba parte interesada sira bele ajuda hodi identifika sé mak tenke partisipa. Importante hodi garante katak indivíduu sira ne'ebé partisipa tenke iha koñesimentu no bele fó dadus kona-ba situasaun atuál iha komunidade.

Partisipante sira bele inklui: fornesedór servisu lokál ka kontraktór sira; administrasaun lokál; lider komunitário; reprezentante sira husi grupu sira ne'ebé bazeia ba komunidade ne'ebé ligadu ho projetu, programa ka servisu (hanesan inan-aman ka grupu konsumidór bee, komisaun saúde) no sidadaun sira ne'ebé uza servisu ka hetan benefísiu husi programa ka projetu.

Diskusaun grupu foku tenke hala'o iha tempu ne'ebé konveniente ba parte interesada atu tuir. Ita bele hala'o sorumutu ne'e iha edifísiu público iha komunidade, ka iha fatin servisu público nian, ho nune'e bele halo monitorizasaun iha momentu hanesan.

Etapa 3: Buka tuir rekursu sira

Ekipa auditoria sosiál tenke lidera prosesu. Di'ak liu bainhira fasilitadór na'in-3 lidera sorumutu ne'e: Ema ida bele lidera fasilitasaun, ema ida bele ajuda halo fasilitasaun no garante katak ema hotu-hotu partisipa, no ema ida seluk rejista resposta sira.

Prepara *flip chart* ida hodi rejista resposta sira.

Nu'udar exemplu, ba Postu Saúde iha Timor-Leste, Ministériu Saúde nia kontribuisaun sira hanesan tuir mai:

Tipu rekursu sira	Rekursu sira ne'ebé promete tiha ona	Ezekusaun
Rekursu umanu	Médiku Klínika Jerál - 1 Enfermeira - 2 Parteira - 2 Tékniku Laboratóriu - 1 Farmaséutiku - 1 Tékniku (EIS) Traballadór Ausiliár - 2	
Ekipamentu	Sistema Komunikasaun (rádiu) Ekipamentu kadeia-frio (Konjeladór, jeleira) ...Nst. ...Nst.	
Medisina	...hanesan defini iha lista ai-moruk esensiál	
Infraestrutura fízika	Privasidade Ahi-oan di'ak, ventilasaun Abastesimentu bee no fasilitade fase liman ba pesoál no pasiente ...Nst. ...Nst.	

- Konfirma rekursu sira ho grupu
- Kompleta koluna ‘Ezekusaun’ bazeia ba informasaun husi grupu kona-ba situasaun real iha nivel lokalizasaun.

Verifika rezultadu sira nu'udar grupu ida (ka grupu ki'ik husi ekipa auditoria sosiál no reprezentante husi fornesedór servisu sira ne'ebé importante). Vizita instalasaun (se karik seidauk hala'o enkontru iha ne'ebá) no verifika prezensa fízika husi kontribuisaun ne'ebé promete hela ne'ebé temi iha tabela ne'e.

Etapa 4: Prepara Tabela Buka Tuir Rekursu Sira ne'ebé kompletu ona ba Sorumutu Interfase.

INSTRUMENTU 3 – Grupu Foku ba Pontuasaun

Instrumentu ida-ne'e deskreve oinsá bele uza grupu foku ho utilizadór servisu no fornesedór servisu sira atu pontualiza ka avalia dezempeñu servisu, programa ka projetu.

Husu kada grupu atu determina sira-nia indikadór rasik hodi avalia servisu, projeto ka programa. Atu aumenta ida-ne'e, bele uza mós indikadór dezempeñu ne'ebé padronizadu hodi fasilita komparasaun entre grupu sira ne'ebé diferente.

Fornesedór servisu fó auto-avaliasaun ba servisu ne'e, maibé utilizadór servisu fó avaliasaun kona-ba servisu ne'e.

Dadus husi prosesu pontuasaun inklui dadus kuantitativu kona-ba utilizadór no fornesedór sira-nia satisfasaun no kualidade servisu, no mós dadus kualitativu kona-ba justifikasaun ba klasifikasaun no rekomendasaun sira hodi hadi'ak servisu ne'e.

Hafoin grupu ida-ida halo avaliasaun independente ba dezempeñu husi servisu ne'e, sira mai hamutuk hodi diskute sira-nia rezultadu ida-idak durante Sorumutu Interfase.

Liuhi prosesu diálogu durante Sorumutu Interfase, sei fahe no diskute opiniaun hanesan no/ka diferente, hodi fasilita komprensaun konjunta. Diálogo ne'e mós oferece oportunidade hodi identifika solusaun lokál ho nune'e bele hadi'ak servisu, programa ka projetu.

Etapa 1: Determina grupu sira ne'ebé kompostu husi parte interesadu no número grupu foku

Identifika grupu utilizadór oioin no grupu fornesedór oioin no determina número grupu-alvu ne'ebé sei halo. Número grupu-alvu sei depende ba tempu ne'ebé disponivel hodi hala'o auditoria sosiál no mós ekipa auditoria sosiál nia disponibilidade. Sei depende mós ba tipu grupu ne'ebé ema sira prefere hodi fasilita diskusaun nakloke (n.e. feto sira de'it ka foin-sa'e sira de'it).

Kada grupu tenke inklui ema na'in-8-15 ho karakterística sira ne'ebé atu hanesan. Nu'udar exemplu, ba utilizadór servisu:

- Feto sira de'it (utilizadór servisu)
- Mane sira de'it (utilizadór servisu)
- Foin-sa'e sira de'it (utilizadór servisu)
- Estudante sira de'it (utilizadór servisu)
- Komisaun ka grupu bazeia ba komunidade ne'ebé eziste ona no relevante ho foku husi auditoria sosiál (grupu inan-aman, komisaun jestau saúde)

Nu'udar exemplu, ba utilizadór servisu:

- Fornesedór servisu (funcionáriu públiku)
- Pesoál kontraktór
- Bele mós organiza grupu hirak-ne'e bazeia ba jéneru, karik apropiadu.

Etapa 2: Organiza grupu foku no konvida partisipante sira

Diskusaun grupu foku tenke hala'o iha tempu ne'ebé fasil ba parte interesada atu tur. Ita bele hala'o sorumutu ne'e iha edifísiu públiku iha komunidade, ka iha fatin servisu públiku ne'ebé monitoriza daudaun.

Etapa 3: Hala'o Grupu Foku ba Pontuasaun

Iha pontu balu ne'ebé tenke foka ba iha Grupu Foku ba Pontuasaun:

Determina indikadór sira:

- Husu grupu ne'e atu determina sira nia indikadór dezempeñu rasik - Husu grupu atu responde ba pergunta: 'servisu di'ak iha karakterística saida de'it?' (foka ba tópiku husi auditoria sosiál – servisu, programa ka projetu. Nu'udar exemplu, kuidadu saúde, edukasaun, konstrusaun estrada).
- Grupu tenke determina lista indikadór sira. Fasilitadór bele ajuda hodi hamenus lista ne'e, hodi determina indikadór 3-4 de'it. Husu ema ida-idak atu vota, karik nesesáriu, hodi hamenus lista ne'e, no determina indikadór 3-4 de'it.
- Rejista indikadór sira ne'ebé aseita ona iha tabela (haree exemplu iha okos)
- Atu aumenta indikadór sira ne'ebé grupu hili ona –bele fó indikadór balu ne'ebé determina antes, hanesan "satisfasaun globál husi servisu/programa/projetu" ka "satisfasaun ho servisu saúde nia disponibilidade". Aumenta indikadór adisionál hirak-ne'e ba tabela no esplika ba grupu, hodi garante katak indikadór hirak-ne'e relevante ba kontestu.

Avalia dezempeñu husi servisu, programa ka projetu

- Esplika ba grupu kona-ba votasaun no pontuasaun.
- Sujere atu uza pontuasaun ho valór 5 (háree exemplu iha okos) no esplika diferença entre valór ida-idak
- Husu partisipante sira atu vota ba indikadór exemplu ida (nu'udar exemplu ekipa futeból lokál nia dezempeñu) ho nune'e sira hatene prosesu
- Tuir mai fasilitadór tenke konvida membru grupu atu klasifika dezempeñu husi servisu ne'e bazeia ba indikadór ida-idak. Rejista rezultadu sira iha flip chart. Fasil liu atu vota ba indikadór ketaketak, la'ós hamutuk

Rejista valór globál

- Sura votu sira ba kada pontuasaun. Rejista valór ne'ebé simu votu barak liu.

Diskusaun

- Hafoin completa votasaun, fasilitadór sei lidera diskusaun iha grupu hodi rona opiniaun husi kada partisipante no justifikasaun ba sira-nia pontuasaun. Inklui rezumu badak iha flip chart kona-ba justifikasaun ba votu bazeia ba kada indikadór.
- Fasilitadór tenke husu grupu atu identifika asaun ka dalan hodi hadi'ak servisu, programa ka projetu. Inklui rezume badak iha flip chart kona-ba sujestau sira hodi hadi'ak bazeia ba indikadór ida-idak.

Tipu Grupu: _____

Fasilitadór: _____

Data: _____

Indikadór Dezempeñu	Aat tebes (1)	Aat (2)	Natoon (3)	Di'ak (4)	Di'ak tebes (5)	Valór globál	Justifikasi saun ba pontu	Sujestaun hodi hadi'ak
Hakerek indikadór								
Hakerek indikadór								
Hakerek indikadór								
Hakerek indikadór								

Etapa 4: Transfere rezultadu husi prosesu Grupu Foku ba Pontuasaun ba Formuláriu Rezumu. Sei fahe Formuláriu Rezumu ne'e durante Sorumutu Interfase

Tipu Grupu: _____

Fasilitadór: _____

Data: _____

Indikadór Dezempeñu	Valór globál	Justifikasi saun ba pontu	Sujestaun hodi hadi'ak
Hakerek indikadór			

INSTRUMENTU 4 – Levantamentu Auditoria Sosiál

Instrumentu ne'e deskreve levantamentu auditoria sosiál (survey).

Importante atu suporta pontu fokál komunidade no komisaun sira atu lidera instrumentu ida ne'e, ka involve sira maka'as bainhira posivel.

Levantamentu ne'e inklui indivídu sira ne'ebé uza servisu lokál, envolvidu iha programa ka hetan impaktu husi projeto. Iha levantamentu ne'e Ita-Boot husu pergunta ba amostra ida husi utilizadór servisu ne'ebé Ita-Boot identifika tiha ona (háree Etapa 2).

Utilizadór servisu sira responde ba pergunta lubuk ida ne'ebé ita prepara ona. Pergunta sira bele nakloke ka la nakloke, no bele inklui pergunta balu ne'ebé uza eskala ba entrevistadu sira atu hili resposta ida.



SUJESTAUN – Karik Ita presiza ajuda husi peritu hodi hala'o levantamentu, liuliu hodi estabelese amostra husi respondente sira no analiza dadus ne'ebé halibur ona, tanba etapa hirak-ne'e tékniku tebes. Bele hetan apoioi husi parte seluk n.e. Fundasaun Azia ne'ebé iha esperiênsia luan kona-ba hala'o levantamentu sira iha Timor-Leste.

Depois hala'o levantamentu, sei analiza resposta sira hodi hetan informasaun kuantitativa kona-ba utilizadór servisu sira-nia opiniaun.

Pergunta nakloke bele fó informasaun kualitativa kona-ba sujestaun sira husi utilizadór servisu kona-ba oinsá bele hadi'ak servisu sira.

Depois completa levantamentu iha nível uma-kain, presiza tempu atu analiza resposta hotu-hotu husi entrevista sira no prepara relatório ida kona-ba konkluzau sira husi levantamentu.

Depois halibur no analiza dadus, bele fahe rezultadu sira ho komunidade (durante Sorumtu Interfase) no mós ho parte interesada sira seluk ne'ebé relevante –OSS sira seluk, reprezentante sira husi Governu no komunidade sira seluk.

Etapa 1: Determina pergunta sira ne'ebé sei uza iha levantamentu

Bazeia ba foku husi ita-boot nia auditoria sosiál, etapa primeiru mak atu determina tópiku lubuk ida ne'ebé ita hakarak ezamina iha levantamentu no tuir mai determina pergunta sira ne'ebé sei husu ba membru komunidade liuhosi levantamentu ne'e.

Bele husu tipu pergunta oioin:

- Pergunta la nakloke – respondente hili nia resposta husi lista badak
- Pergunta nakloke – respondente responde ho nia lia-fuan rasik
- Pergunta loos/la loos – respondente hili entre opsaun rua ne'e
- Pergunta ho pontuasaun ka valór – husu respondente atu ‘pontualiza’ nia esperiênsia ho eskala entre 1-3 ka 1-5.

Susar liu atu analiza pergunta nakloke bainhira kompara ho pergunta seluk. Maibé, sei ajuda komunidade fó sujestaun hodi hadi'ak servisu.

Bazeia ba foku husi Ita-Boot nia auditoria sosiál, levantamentu bele kobre tópiku sira tuir mai:

• Asesu ba informasaun	<i>Transparénsia husi informasaun ne'ebé fornesedór servisu fó ba komunidade</i>
• Komunidade nia envolvimentu	<i>Komunidade nia partisipasaun hodi planeia servisu, programa ka projetu no sira-nia partisipasaun iha implementasaun</i>
• Disponibilidade, asesu no utilizasaun ba servisu, programa ka projetu	<i>Karik membru komunidade iha asesu di'ak ba servisu, programa ka projetu ne'e, no oinsá membru komunidade utiliza servisu ne'e</i>
• Kualidade no fiabilidade husi servisu	<i>Membru komunidade nia hanoin kona-ba kualidade husi servisu, programa ka projetu</i>
• Servisu nia folin	<i>Membru komunidade selu hira ba servisu, programa ka projetu, no karik komunidade haree folin ne'e apropiadu ka lae</i>
• Trata keixa – oinsá trata kestaun rumu ne'ebé komunidade enfrenta	<i>Oinsá membru komunidade hato'o keixa kona-ba kestaun rumu ne'ebé sira hetan no oinsá fornesedór servisu fó atensaun ba keixa sira</i>
• Sujestaun hodi hadi'ak	<i>Idea sira husi komunidade hodi hadi'ak servisu, programa ka projetu</i>

Etapa 2: Determina amostra ba partisipante sira iha levantamentu

Importante tebes katak Ita-Boot iha koñesimentu kona-ba amostrajen no esperiénsia hodi prepara amostra ida bainhira ita hala'o levantamentu nu'udar parte husi auditoria sosiál. Bainhira ekipa auditoria sosiál laiha esperiénsia hanesan ne'e, sira tenke buka ajuda husi ema seluk.

Tenke konsidera parte oioin bainhira determina amostra:

- Defini grupu sira ne'ebé relevante ba auditoria sosiál – n.e. ema sira ne'ebé utiliza Postu Saúde
- Defini sub-grupu rumu iha grupu ne'e – n.e. mane, feto no labarik sira/foin-sa'e ne'ebé utiliza Postu Saúde ne'e
- Defini amostra mínima ba número respondente ne'ebé sei partisipa iha levantamentu – n.e. sei entrevista mane, feto, labarik /foin-sa'e na'in hira?
- Deside atu hili grupu ne'e ho métodu “random” (aleatoriu/acak) ka ekipa auditoria sosiál sei hili grupu ne'e.
- Defini prosesu ba ekipa levantamentu dadus hodi determina amostra no número ba kada sub-grupu

Etapa 3: Hala'o levantamentu

Ita tenke fó treinamentu ba ekipa entravistador hodi hala'o levantamentu. Diak atu hala'o pré-teste ba levantamentu ho ekipa molok hala'o levantamentu iha komunidade. Tuir Ita-Boot nia planu amostrajen, tuir mai ekipa tenke hala'o levantamentu.

Etapa 4: Hatama dadus, halo análise no relatório

Bele hatama dadus husi levantamentu iha aplikasaun komputadór hodi apoia análise. Karik uza tablet, bele upload dadus ba programa SPSS. Karik uza surat-tahan hodi hala'o levantamentu, bele hatama dadus iha Microsoft Excel.

Ba pergunta sira ne'ebé la nakloke, bele hatama dadus ho uza kategoria sira ho kódigu ne'ebé determina antes.

Bele hatama no kategoriza resposta sira ba pergunta nakloke, tuir tema komún.

Ita-Boot nia análise ba dadus husi levantamentu tenke bazeia ba foku husi Ita-Boot nia auditoria sosiál. Ita-Boot interesadu atu aprende kona-ba área prinsipál saida de'it?

- Uza area foku oioin hodi relata rezultadu husi levantamentu
- Uza komparasaun hodi apresenta konkluzaun iha relatório. Nu'udar exemplu, halo komparasaun entre servisu oioin; komparasaun entre fatin diferente; komparasaun entre sub-grupu diferente.

Ita-Boot tenke prepara relatório ida kona-ba rezultadu husi levantamentu. Garante katak lia-menon prinsipál iha levantamentu tenke relevante ho audiénsia oioin iha auditoria sosiál.

Haree 'PROSESU 5: Hakerek relatório finál ba auditoria sosiál' hodi hetan tan informasaun kona-ba oinsá halo relatório no konsiderasaun kona-ba oinsá komunika ba audiénsia ne'ebé diferente.

Instrumentu ne'e utiliza informasaun husi rekursu sira iha okos, no bele hetan informasaun adisionál iha:

http://integrityaction.org/sites/default/files/training_materials/CIB_GuideENG_2014.pdf

https://www.unicef.org/vietnam/citizen_TA.pdf

http://www.civicus.org/documents/toolkits/PGX_H_Citizen%20Report%20Cards.pdf

INSTRUMENTU 5 – Sorumutu Interfase no planu asaun

Instrumentu ne'e deskreve Sorumutu Interfase, ne'ebé ema balu hanaran 'Audisaun Pùblika'.

Sei hala'o ona Sorumutu Interfase depois halibur dadus hotu-hotu durante siklu auditoria sosiál. Konkluzaun prinsipál husi dadus hotu-hotu sei fahe iha sorumutu ne'e, no hola desizaun kona-ba asaun sira ne'ebé nesesáriu hodi hadi'ak servisu, programa ka projetu.

Importante atu suporta pontu fokál komunidade no komisaun sira atu lidera instrumentu ida ne'e, ka involve sira maka'as bainhira posivel.

Etapa 1: Prepara dadus hotu-hotu ne'ebé halibur durante auditoria sosiál no prepara konkluzaun prinsipál sira hodi apresenta iha Sorumutu Interfase

Durante Sorumutu Interfase, fahe konkluzaun sira husi dadus hotu-hotu ne'ebé halibur tiha ona. Garante atu apresenta konkluzaun sira ho maneira ne'ebé audiénsia hotu-hotu bele hetan asesu no garante katak ema partisipante sira bele hetan asesu ba dadus ne'e no fasil ba partisipante oioin atu komprende. Bele apresenta informasaun iha flipchart, ka uza apresentasaun simples ida ho PowerPoint.

Etapa 2: Organiza sorumutu no konvida partisipante sira

Konvida parte interesada oioin

Parte interesada oioin ne'ebé relevante ba program ka projetu ne'ebé auditoria sosiál foka ba sei tuir Sorumutu Interfase. Reprezentante sira tenke mai husi: komunidade (inklui grupu vulneravel); lider komunitáriu; fornesedór servisu - funzionáriu pùbliku lokál ka kontraktór lokál; no membru Governu ka administrasaun, liuliu iha nível Suku no Munisípiu.

Garante katak fatin no tempu atu hala'o sorumutu ne'e fasil no disponivel ba grupu parte interesada oioin atu bele tuir.

Importante katak atu rona opiniaun no lian hotu-hotu iha Sorumutu Interfase. Presiza fasilitasaun di'ak hodi realiza ida-ne'e.

Ita-Boot presiza membru na'in-rua husi ekipa auditoria sosiál hodi fasilita no ema sira seluk hodi hakerek rezultadu sira husi enkontru.

Etapa 3: Hala'o Sorumutu Interfase

Importante atu fasilita Sorumutu Interfase ho maneira ne'ebé promove diálogu, kria komprensaun konjunta entre grupu parte interesada oioin no promove asaun konjunta hodi hadi'ak servisu, programa ka projetu ne'ebé sai foku husi auditoria sosiál.

Kria ambiente pozitivu, ne'ebé la foka hodi tau sala ka kestiona ema nia asaun, maibé foka ba rekomendasau sira hodi halo melloramentu no asaun konjunta hodi realiza melloramentu.

Sorumutu Interfase inklui faze balu ne'ebé importante:

Aprezenta resultadu sira husi auditoria sosiál

- Depende ba instrumentu (sira) ne'ebé ita deside atu uza, tenke aprezensta dadus husi kada instrumentu.
- Reprezentante husi kada grupu bele fahe sira-nia dadus ba grupu tomak.

Lidera diskusaun kona-ba konkluzaun prinsipál sira

- Fasilitadór sira lidera diskusaun ho grupu kona-ba
 - Konkluzaun prinsipál sira – resultadu sira ne'ebé atu hanesan ka diferente husi grupu parte interesada oioin no justifikasaun ba valór ne'ebé sira fó.
 - Rekomendasau sira hodi hadi'iak – idea sira ne'ebé atu hanesan ka diferente hodi hadi'ak servisu sira.

Planeamentu asaun

Bazeia ba rekomendasau sira grupu tenke determina hamutuk asaun ne'ebé sai prioridade hodi hadi'ak servisu, programa ka projetu.

Iha sorumutu ne'e tenke prepara rejistru kona-ba asaun sira ne'ebé aseita ona.

Grupu parte interesada ne'ebé diferente sei responsavel ba asaun sira ne'ebé diferente. Bele foti asaun balu iha nivel komunitáriu, maibe asaun seluk ruma bele presiza reforma no advokasia durante tempu naruk hodi influensia mudansa.

Fasilitadór tenke garante katak grupu ne'e konsidera asaun oioin no tenke hetan konsensu entre utilizadór servisu no fornesedór servisu sira.

Iha okos bele haree modelu ida hodi prepara planu asaun.

Asaun	Sé mak iha responsabilidade?	Bainhira atu halo?	Hein ba Resultadu saida?	Sé mak halo monitorizasaun ba asaun?

Etapa 4: Konfirma Planu Asaun ne'ebé aseita ona no esplika Faze 3 iha siklu auditoria sosiál – Halo promosaun ba Reforma

Sorumutu Interfase nu'udar prosesu importante tebes iha auditoria sosiál. Fasilitadór tenke hato'o obrigadu ba ema hotu-hotu nia partisipasaun iha auditoria sosiál durante ne'e.

Fasilitadór bele enkoraja mós sira-nia partisipasaun kontíniu hodi garante atu realiza asaun sira. Fasilitadór bele mós mensiona Faze 3 (advokasia) husi auditoria sosiál.

Bele taka sorumutu ne'e ho selebrasaun ida kona-ba servisu ne'ebé halo durante ne'e no mós halo kompromisu atu servisu hamutuk iha futuru.

Instrumentu ne'e utiliza informasaun husi rekursu sira iha okos, no bele hetan informasaun adisionál iha:

https://www.unicef.org/vietnam/Community_TA.pdf

http://www.wvi.org/sites/default/files/CVA_Field_Guide_0.pdf

6. REFERÉNSIA ÚTIL

Informasaun barak liután kona-ba auditoria sosiál no instrumentu halibur dadus auditoria sosiál bele hetan husi rekursu sira iha okos.

Importante katak rekursu hotu kontestualiza no adapta ba kontestu no parte interesada sira Timor-Leste nian.

Socio-economic development plan social audit toolkit

https://www.unicef.org/vietnam/resources_20718.html

- * Instrumentu ne'e prodús entre tinan 2010-2012 husi Projektu Hasa'e Kapasitasaun ba Auditoria Sosiál kona-ba Planu Dezenvolvimentu Sosio-ekonómiku entre UNICEF no Ministériu Planeamentu no Investimentu iha Vietnam. Instrumentu ne'e fornese manual ho detalle relevante ho instrumentu ne'ebé nota tiha ona iha Timor-Leste nia Matadalan.

Using Public Expenditure Tracking Survey to Monitor Projects and Small-scale Programs / A Guide Book, Koziol and Tolmie, The World Bank, 2010

<https://openknowledge.worldbank.org/handle/10986/2502>

- * Matadalan ida ne'e fornese orientasaun ba organizasaun sosiedade sivil sira wainhira hala'o Levantamentu kona-ba Buka Tuir Despeza Pública, iha eskala rua kiik no boot. Ida ne'e fornese vizaun jerál husi planeamentu, atu hala'o no halekar rezultadu sira ne'e.

Monitoring and Evaluation of Public Services

<http://www.civicus.org/index.php/media-center/toolkits/611-participatory-governance-toolkit>

http://www.civicus.org/documents/toolkits/PGX_H_M&E%20of%20public%20services.pdf

- * Husi Kolesaun instrumentu ne'e fornese dalan inovasaun ba sidadaun sira atu monitoriza no evalua asesibilidade, kualidade no efisiénsia husi servisu públiku - ne'ebé sei hatudu fornesementu servisu ne'ebé di'ak ho kualidade moris sidadaun nian ne'ebé diak liu tan. Website ida ne'e fó detalle kona-ba instrumentu sira ne'ebé nota tiha ona iha Matadalan kona-ba Auditoria Sosiál ba Timor-Leste.

Strengthening World Vision policy advocacy - a guide to developing advocacy strategies

<https://www.odi.org/sites/odi.org.uk/files/odi-assets/publications-opinion-files/7261.pdf>

- * Kona-ba ‘oinsá atu orienta’ ne’e espesifikamente dezenvolve husi programa RAPID – Overseas Development Institute (ODI) ba funzionáriu sira husi World Vision nia Eskritóriu Nasionál atu uza no kompleta workshop formasaun ne’ebé fó husi program RAPID ba funzionáriu World Vision husi Zambia no Uganda durante tinan 2010. Ida ne’e sai mós hanesan referénsia matadalan ida ba sira ne’ebé hakarak atu dezenvolve planu ba advokasia.

